



# SISOBRAO JUMANG

*Fridina Koknat Marah*



# SISOBRAO JUMANG



Senokgipa :  
**Fridina Koknal Marak**

# **SISOBRAO JUMANG**


Fridina Koknal Marak

@ A-chik Literature Society

First Edition : 2011

No. of Copies : 1000

Dam : Rs. 50/-



Printed at Labanya Press, Guwahati-1

# Katta Bichongrang

Jak

Aganchengani.....	4
Fridina Koknal Marak.....	7
1. Sisobrao Jumang .....	12
2. Angni School .....	36
3. Ma·giparang aro A·songni Mikkangchi Ong·bagni Salrang .....	42
4. National Film Award : 1993 .....	45
5. Salgro Salaram A·dok .....	48



## AGANCHENGANI

“Sisobrao Jumang” ine chinga ia ki-tap bi-sani bimingko donna namnikaha. Sisobrao Jumangara ia ki-tapo man-chapatgipa seanirangoni mingsa ong-oba, ianon Ma Fridina Koknal Marakni gisikni re-ani, jatna a-songna ka-saani, A-chikni dakbewal-rikbewalko ripingna skani, seani ritingantion, sentence ge-antion jojranga. Uni gimin chinga iakon katta bichongna kranikbea.

Adita bilsirangna skang, Shillongo kam ka-gipa A-chik me-chik Officerrang Dol ge-sako bikote, una Noringro Nojingjo Organisation (N.N.O.) ine biming on-aha. Noringro Nojingjoni ortoara “Aski Tom-daksa”. Ia Dolni skanggipa Presidentara Ma Fridina Koknal Marak. Gipin member-rangara Ma Heroine Bangshall Sangma, Ma Debilla Bolwary Marak, Ma Anita Lizana K. Sangma, Ma Verna K. Sangma, Ma Kamala Raksam Marak, Ma Bharati B. Sangma, Ma Withmollish Mangsang Sangma, Ma Isabella D. Marak, Ma Hannah Lee Kin Kaid Cheran Momin, Ma Hemalata Chambugong Marak, Ma Mirnaloy Dajel Marak, Ma Jahanara Koksi Sangma, Ma Keziah Me-cheng Sangma, Dr. Kumie Raksam Marak aro Ma Brucellish Koksi Sangma.

Dolni manderang an-tangtang bang-a bang-ja on-grime, A-chikska-rangoniko gile aro Gauhatini Assam Academy For Cultural Relations-ni, Pa Harendra Wa-ge Marakni tom-chimonggimin Ku-bidikko chapa ka-atgipako bree lapna palskae adita tangkarangko chimongaha. Uchin Dolni nangchongmotgipa bosturangko brechenge, A-chikkuo segimin ki-taprangko aro A-chikrangni rokomari jako gitoko gananirangko aro rangrangko bree chimongaha. Adita susaanirangko A-chik bi-sarangnaba dakate boksirangko on-aha.

Indiba brikalgipa memberrang kamoni neng-take re-bildangtokahaon, ia Dol be-gruange, ja-mano dongsrangjaha.

Adita bilsirangni ja·mano Turao donggipa member gitchamrang, N.N.O.-ni bosturangko pale aro Banko donggipa tangkako oksrange, bribatgipa member sakgittamni seanirangko ki-tap chapa ka-atskana tom·e chanchiaha. Ia somoeo Ma Kamala Marakba DIET-ni Principal ong·e Turaona re-baaha; indake bini dakchakaniko bang·en man·aha.

Ma Fridina aro Ma Heroine re·rorona bil dongjahani gimin, Dr. Kumie aro Ma Brucellish baditaba chang re·anga re·baa dake, ku·pattianiko ra·rurae, agangrikanirangko matchotataha. Indake Ma Fridina, Ma Heroine aro Ma Vernani seanirangko ki-tap dakna tik ka·manchaaha. Shillongchi re·angarango gipin memberrangko gronge, gronggi-jarangminga phonechi agangrike aro grongsranggi-jagiparangba ia tik ka·aniko ra·chakpaaigen ine ka·donge, ki-tap dakna chanchianiko kamo chu·sokatna ja·ku ga·aiaha. Ian 2009-ni a·bachengachibara.

Dr. Kumie aro Ma Brucellish, Ma Fridinako grongna re·angon, ua an·tangan basee uni seanirangko chingna on·ataha. Badiabarangde sechenggipako tong·kandi setaienggiparangsa, mitama on·jotani aro namatpilani donggiparangsa ong·ani gimin, seanirangko tik bimango dontaina nangahae, ki-tapko nakatatningna man·jaha. Chingni uko grongtaina re·angon, Ma Fridina skanggipa bilonge saaoni nambapilenga. Ua an·sengsrangahaon, gipin seanirangko basee mingsa minggni on·dapkugen ine aganachim. Neng·taksrange ja·mano basena man·aigen ine chingni aganon, ua bakan an·sengpilaigen aro basee on·dapatna man·aigen ine aganchaka. Indiba ia chol chingona sokbana skangan uko Nokgipa Isol neng·takkamsrangkan rimangaha. Ma Fridina ia ki-tapko nikna baditan kusi ong·begenchim.

Garó Graduates' Unionni 2009-ni "Mikaoa" magazineo, Ma Brucellish Ma Fridinani photoko on·chape uni gimin sea. Uko kingsa bina ra·ange on·on, ua kusi ong·bee, angni ki-tapo

ia·koba man·chapatbone ine ua an·tangan aganani gimin, ua seanikoba iano man·chapata.

N.N.O.-ni minggipin chanchichotaniara ianchim :  
“Ki·tapko N.N.O.-ni koroschi chapa ka·atgen, indiba A·chik Literature Society pale ra·china ki·taprangko on·an baksanaba, Copyright·koba ia Society·nan on·gen. Ki·tap pala bon·o chapa ka·attaina am·oba maming badi dongjawa”.

N.N.O.-ni chimonggipa A·chikku magazinerang aro ki·taprangko A·chik Literature Society·na on·manaha.

Ia ki·tapko brean baksa, palanio dakchakpaode chinga kusi ong·begen, maina A·chik Literature Society A·chikkuo sea·jotaninasan kam ka·aigija, A·chik jatni namgnina, A·chikni dakbewal rikbewalrangko ripingna on·kange kam ka·enggipa Dol ong·a.

Mittelbea.

Dr. Kumie R. Marak

Ma Brucellish K. Sangma

(N.N.O. Memberrangni palo)



## FRIDINA K. MARAK

I ano on-gipa photoara 1975 bilsio ka-gipa, Fridina Koknal Marakni photo. A-chik me-chikrangoni niksengbatgiparangoni saksa, Fridina 1928 bilsini April jani 13 tariko Turao atchiaha. Pagipara SingdonKoksi Sangma aro ma-gipara Panse Koknal Marak. Singdon Koksi Babelaparao L.P. Schoolo skia. Kamoni 1938 bilsio neng-take ua Lucy Smith Book Roomo



jao Rs. 20/-na Superintendent ka-a. Apsan somoeon double-storeyed Boys' Hostel ge-gnioni ge-sani Superintendent ong-e, jao Rs. 20/-ko man-a. Segipani siani ja-manosa, Panse Koknal Chandmaryo cha dokan kulia.

Singdon Koksi aro Panse Koknalni dedrang sakbri : demechik dejakra Elina; gnigipara Fridina. Unikode depante Benard aro deokgite Sandford. Elinako kni ro-e chambile nitoana mitteltokbea. Una bakrogipa janggi tanganiko sesojae, ua 1948

bilsion siaiaha. Benard Koknal Veterinary Departamento Joint Director ong-achim; uaba siangsoaha. Jongchon Sandford Koknal Political Scienceo aro Economics M.A. pass ka-a. Ua Education, P.H.E., Health aro uagita mongsonggipa portfoliorangko Cabinet Minister ong-e nirokachim. Uaba siangsoaha.

Fridina American Baptist Mission Schoolo poraichenge, Tura Government High Schooloba poraia. Ua Lucknowni King George's Medical Collegeo 1947 oni 1953 ona poraie Nursing Graduate ong-a. Ua skangni Agra and Oudh Provinceoniko scholarship man-achim ine agana. Ja-mano ua Gauhati

Universityni ning-o Matriculation Examinationko pass ka-a. Ua ia apsan Universityni ning-on Intermediate Artsko pass ka-a aro Bachelor of Arts degreekoba man-a. Ua Indian Institute of Mass Communication, South Extension, New Delhio poraia.

Dambemitingo uni namnikgipa kal-aniranga badminton aro basketball. Ua Lucknow Women's Basket Ball Teamni memberba ong-achimna. Poraia matchote Fridina Lucknowni Lady Dufferine Hospitalo Nursing Sister ong-e kam ka-aha. Unomitingo Garo Hills gugrakugijagipa Assamni bak ong-engani gimin, Fridina Tura Kalazaar Hospitaloba kam ka-aha. Ua Nursing Sister ong-e gimik gimang bilsa 11 kam ka-aha. Lucknow-o nursing courseko poraina uko bon-kamgipa bigil gipok, gugrakugijagipa Assamni Governor Sir Andrew aro Mrs. Clow dakchakaha. Bano poraina ska ine biapko basena on-oa, "luck"-ara rasong aro "now"-ara da-on, da-on rasong namenga ine chanchie ua Lucknowko seokaha ine agana. Tura Government Multipurpose Schoolo Garo skigipa dongja. A-chik bi-sarangde bon-gramaignok ine, Turani ma-a paarang Fridinako sana banani kamko wate Garo skichina mol-molaha. Indakesa ua Nursing kamoni chel-e re-baaha aro Assam Education Serviceni ning-o 1960 oni 1965 ona skigipani kamko jako ra-aha.

1965 oni 1977 bilsionade Fridina Government of Indiani Information and Broadcasting Ministry, Central Information Serviceni ning-o Field Publicity Officer ong-achim. 1985 bilsio ua Meghalaya Bank Recruiting Boardni member ong-achim. Ua 1989 oni 1991 ona Meghalaya Handloom and Handicrafts Development Corporationni Chairmanba ong-achim. Fridina 1978 oni 1984 ona Meghalaya Public Service Commissionni member ong-e jatangna a-songtangna kam ka-aha.

Fridina Koknal badia Dolna ba Association-na kam ka-jaha ine sandinan altubatsusu nikpila. Segipa-jotgiparangni, ring-gipa dokgipa dam-giparangni, me-chikrangni, chadamberangni, chatro-chatrirangni, jatni namgnina ka-giparangni aro gipin gipin dolrangna uni dilani aro kamo on-gilani ma-kaa. Fridina Garo Hills District Socio-Cultural

Club-ni Founder Secretary ong-achim. Garo Graduates' Unionniba ua Founder Secretary ong-achim. Ua A-chikkuo sea-jotananaba gisik nangbeachim. Shillong Garo Literature and Cultural Societyngi Founder memberrangoni saksa ong-e, jatni sea-jotaniko bariatna aro jatni dakbewal rikbewalrangko ripingna ua raken kam ka-dilaha. Ia Societyngi bakrime kam ka-anichi Garo subjectko B.A. syllabusso napchapatna man-aha. Shillongo kam ka-gipa A-chik me-chikrang Noringro Nojingjo (constellation) Dolko bikoton, ukon Founder President songaha. Ia Dol A-chik me-chikrang aro schoolo poraigiparangni namgnina kam ka-aha. Ua dingtang dingtang Socio-Cultural Organisationrangni Advisory Boardrango, jekai Assam Sangeet Natak Academy, Meghalayani Art and Culture Board aro All India Radio, North East Region-o dongpae dakchakaniko on-aha.

Fridina man-e cha-gipa gadangni lekka-pora donggipa nokdango atchijahaoba, toromna, lekka-porana, jatni changa-sapani, dakbewal-rikbewalrangko ripingna gisik nanggipa nokdango atchie, ua janggi tanganina name tarisoako man-gipa ong-a. Jattangni namgnina uni kam ka-aniko chol dongpagiparangna Tura College, Girls' School aro Tura Night Schoolko kulie uarangko tange rakkina tikkeldilano nika. Tura Collegeko aro Girls' Schoolko Sorkarini jako ra-anian uamangni kamni nikna man-gipa bite. Salo okna kam ka-e Collegeo napna man-pagijagiparangna Night Collegeko kulidilanioba uni on-gilani bang-a.

Chel-achi re-e poraipana chol dongja, Turaoba Collegeo seat man-paja dakgiparanga Durama Collegeko kuliosa rang-speaha. Fridina ia Collegeni dingchikbatsranggipa founder memberrangoni saksa ong-a. Ua Durama Collegeni Vice-President ruuten ong-a. 2009 bilsini September jani skanggipa antio Tura Government Girls' Higher Secondary Schoolni skigipa saksa angona rona re-baa. Salsa salgnina skang ia Skigipa Durama Collegeni Busko Tura soroko nikrikana. Ua rang-san Fridinani agana kattarangko gisik ra-ataha ine agana. Salsao Fridina Durama Collegeo kam matchote, Government

Girls' Higher Secondary Schoolni Teacherrangming golpoe romitingo, ua an-tangni Durama Collegena niksamsaniko janapaha. Unomitingo Collegena a-a niengachim aro uko tik ka-srangnasiengachim. Fridina inahana, "Durama College dal-rorogen aro College nokko a-bri totgittamni kosako rikgen. Turani sorok dilmarango Durama Collegeni busrang re-rurajaskal chinga sijawa". Da-o Durama Collegeko a-timbo dakao rikaha; unon classrang ka-engaha. Durama Collegeni busrang Turani sorokrango re-engaha. Fridinani niksamsani bimang pil-ako nika ia Skigipa jagokman-piloba katchabeaha.

Fridina sea-jotanio ja-manchakja; rakmitingo ua magazinerangna articerangko sea; poedokoba sea; uni kolomoni essayrang nakata. "Sangma aro Marak Bil Tosusaa" poedoko ua A-chikrangni aganritingbaanio pangchake sea.

Field Publicity Officer ong-e uni Turao kam ka-mitingo, filmrangko mesokon, ka-enga kamko dongale nina katangako, Chandmary playground sepango donggipa me-apa saksa gisik ra-atpila. Uni ong-atgipa kal-susaanio bak ra-gipa bi-sa, da-ode me-apajok, Fridinani agangipa an-saoatani kattarangko gisik ra-atpila. Knatimgiparangko gisik nangatna, dakna ka-na aratgiparangko kamona sokatna ua changbea. Git banaiani aro ring-anioba ua guntangko parakna kratcha-nikja. Ua Gauhati All India Radio-o git sea, sul on-a. Uni gitrangoni minggniara "Nitata Nang-ni Mikronrang" aro "Donga A-brin' Ka-bako". Uni gitrangko chipgipara Gramophone Company of India Polydor. Git chipmitingo guitar dokgipara Bhupen Hazarikani jonggipa Jayanta Hazarika aro violin saltimgipara mingsinggipa Assamese actor Vijay Shankar. 2002 bilsini Ku-rangma Awardko man-aniara krabebejok.

Turaoni ong-kate a-palo kam ka-aniara Fridinana gipin namgnirangkoba on-aha. Delhio donge Hindiko ku-tang gita aganna man-asan ong-aigija, ua uano dal-gipa chugipa gadangni manderangko grongna aro mitamrangming kam ka-rimna namgipa cholrangko man-aha. Dhubri aro uagita Assamni gipin biaprango kam ka-e aro donge ua Bengali aro Assamese ku-sikrangko name skie ra-na chol man-aha.

Fridinani janggi tanganio duknirangba dongaha. Pagipani siani ja-mano ma-gipa sikdikdik daknikgen ine ma-sie ua cha dokan ge-sako ma-gipana Chandmaryo kulie on-aha. Pringwalni chakate, chaming cha-chapanirangko tarie, ua jongchon baksa uarangko cha dokanona de-e ra-angachim.

Kamo dongmitingo ua Ukil Somendra Kumar Bengaliko Turao civil marriage ka-aha. Dedrang atchiani ja-mano segipa sion, Fridina duko romrome dongaijaha. Dedrangko ua poraiataha, mande ong-ataha. Depante dejakra Pradeep Koknal A-konggre High Schoolo Skigipani kamko ka-achim. Ua 1997 bilsio sia. Depante sa-chon Te-nang Koknal M.C.S. pass ka-e Additional District Magistrate ong-achim. Ua 2006 bilsini Octoberni 6 gipa salo sia. Gnigipa depante Chanang business ka-achim. Uaba 2006 bilsini Decemberni 20 tariko sia. Iarang a-gilsakni ong-bewalan ine ma-sie, Fridina an-tangko dim-dematjaha. Uni ku-pattianirang, lekka seanirang skang gitan ong-angkuaiaha.

Fridinani gisikni re-ani aro chanchiani dikdiksaba dontongja. Songbad poraiako watja; Radio-o 'news' knatimna gualja; politicsni bidingo jojrangpile u-ie, wa-saen jerana man-aia. Jatna a-songna chanchiani maming saloba uoni chel-ja. Da-aloba a-gilsakni noksik nokbakni obostarangni gimin golpoataia. North Eastni, mongsongbate Meghalayani politicsni bidingo golpona ua namnikbea. "BBC late news-ko knagijade anga da-oba tuja", ine ua agana.

Ian gital chasongni, gisik wa-sagipa, taning jakkalgipa, chanchina ta-rakgipa, kangalna alnamgipa, jatangna ka-sagipa, chadambena chakki gita ong-gipa A-chik Me-chik-Fridina Koknal Marak.

**Brucellish K. Sangma**  
Hawakhana, Tura

## SISOBRAO JUMANG

**S**isobrao waltuani pringo anga pringwalni Turaona re-chakatna sikningjaha. Dak banglani samtangtangona re-wilwile nioa, bang-a chanchianirang angona sokbaaha. A-chik A-songko gisik mikronchi niattaitaie, ning-tue chanchiani angni gisikona nabaaha. Nikataha, ua skango diltugipa buring bolgrimrango, chiring chibimarango janggi gnanggipa matburingrang, na-tok na-batrangko. Bol rikeo ba-e mikoenggipa do-orangko. Chanchiata, uarang baditan an-senge, kusi ong-e dongenggenchim. Matburingrangni mikoa ku-rangrangna an-tejrimjrim; do-orangni mejeka, jo-ong gukrangni mikoa chip chip; ringringganti jong-gilwengrang; sam bolrangni bilsu kari ma-ate ritim soksolani bimangrang. Maikai a-bri, chiring chisik, do-o matrang baksa manderangni janggi tangrimani! Duko suko ba ong-ronggija a-sel sokoba meli-ma-gape ua chasongmitingo dongara aiao! Da-o uarangko jumang jumangsa nikatpilaijok. Chasong gital re-bac, obostarangko nikoa, ia pilak janggi tanganirang bachi bilangaha?

Pringni sni adha bajimango ka-asuangsuang dake, chanchianirangko ra-bite, Turaona re-chakatbaaha. Chakatbaon, anga gari chalaigipako on-tisa ka-sinsin chalaichina aganbaaha. Gario mande sakbrisan ong-aioba, gisikni jrima chanchianirangchin, motor garikoba jrima mal gatpetpeta gita an-tangde chanchipilaha. Re-bamitingo anga sorok samtangtangchiko niroroe re-baenga; nikpako nipako mikron okkaani giminde ong-ja, indiba bano basako mai ong-aha uarangkoba mikronchi gisikchi poraibaengasa!

Samtangtango donga a-bri bo-rot bo-tot; indiba chonchongipa sam bolrangna agre, grimsisi srongstrong dake dal-gipa bol pangmarangko nikbaja, jeon chengo ramram

saksan ge-san buring napna pa·ja. A·song mikkim chaatgipa chua chua bolrang bachitokjok, chanchibaenga. Ai! huro mangsa mikoja knaja; makkre amak wacheke jinma roaba dongja; do-rerap gaggakaba bachiaha! April jani mikka chisa chigni waana a·o pa·kape ritimbaenggipa sam bolrang tangsekgilgil mikronko okkaatoba, sal rakchanganon sioldepe bon·aignok ine chanchibaenga. A·briangde gadang gadang chupreta ong·ja; a·a bimang namen daknangbea. Banoba banoba dareng dake chudatgipa a·bidingrang gnang aro ukosa A·chikrang dodatari neng·bee songona nokona sokangtokenga. Ja·retgita re·ode wilwil bawil ong·a ine rama ro·ani gimin, dodatakon namnika. Badiaba songjolonade gingting nanggitotpila rama; attamsrangode aro jajong teng·ode, balgitchak matchok me·samrangba katpakronga. Da·ode indake ong·jahakon, maina nisigiparangde mandean ong·aia.

A·chik manderang a·brini dedrang; a·brion dal·a, a·brini balwakon ringa aro unon janggi gisik ba·kapgimin ong·ani gimin a·brinan ka·paka. Unon rasong chaa; rasong man·a. Onkala biaprangoba A·chikrang a·song ge·e, song nok rike rona dongna man·genchim; indiba A·chikrang a·ding dogate, bal pangsiro nanga biapo song ge·na namnikbea. Unbaksaba, uano chiga ringani namakosa, chiga ringa kosakjoljolo bri bolgrim pangkamakosa; unon chi tangkama ineba ma·sia. Chiga ringa sepangoa, narang, kampil, te·brong te·gatchu ge·jolato namgipa biapkosa. Chikosakkode a·ba o·ja; a·ko ka·sinatna rakkia; songba mikkim chaa. Indide ia A·chikrangni atchu gitcham, ambi gitcham da·ororoni scientistrang, plannerrang aro rural development officerrang ingiparangni chanchianan batpile u·iakon? Maina, nikatenga aro an·tangba skia poraia man·pagipa ong·e ma·sia, ua atchu gitchamrangmang aro da·oni chasongo gipin rori sahep ku·sikrangchi dal·dale biming dona dakarangko. Chanchia, uaba name name ma·sina skode, na·a A·chik ong·ode, pilakan nang·on gnang, angon gnang. Chasongnan janggi tangbaenga, uon janggi ba·kapenga. Englishchi Hindichi biming bikote, habi jabi mingatode, a·song ge·jokma, chiga dakjokma ine angade namen ding·baenga. Dongtojabenga!

Romba A-dingko batbamano gariko dikdiksa dongdikate balwa ringmiting, anga budepabegipa saksa mandeni, angni re-bagimin ramachi mikkange re-angengako grongaha. Bachina re-eng, Atchu, ine sandion, ua Mandalgre songona re-angenga ine aganchakaha. Sisobrao angni jumango nikbagipa Atchuko, ia mandede nikrikchong-motenggen aro ma-sirikenggen ine rim-chipe uo sing-srangaha. Ua Atchu an-tangan Mandalgreni; Sisobrani Atchu baksan chasong apsan. Sisobrani Atchuni kattako janapon aro angni mejatamo nika jumangko aganon, Mandalgreni Atchu rang-san mikkang dingtang kattaan dingtang, ding-do ding-do dakesa aganba-chengaha. Ua Mandalgreni Atchuko anga Sanja minge okamaignok.

Atchu Sanjamangni somoeo song ku-mong-nangrima; mi misi nammiting, ta-ma e-ching silmiting aro a-a mitim dongmitingni katta. Bol rapea dongkuja, a-ba o-e cha-oba bils chikking pangpilekosa apsan a-bako o-diltaiana. Da-o gita wenwen dareng a-ba o-taie cha-oba bilsigni a-jri donari ukon o-piltaio maikai a-ani a-sal donggen. Da-oni obostako chanchiata. Budepani agana gitan, mande okkrikuja mi bebenade, ine u-ina angaba ja-manchakjaha. Iade ge-a gamani golpo, indiba A-chik manderangni gisikkoba angade tosusae nibaengachim.

Atchu Sanja saksa ka-rak; ripengrang, jontangrang aro songni nokni manderangko sahep gipokrangni nokkol ong-atna sikja. Jakgitelni gisiko dal-bagipa, rongjrie chanchigipa. Bang-a somoion a-songtangna, jatangna, songtangna, gittimtangna warachakbagipa ong-akon. Bils ritchasa sotbonga skangni kattako janapon, Sanja gisik bikildoe, budepaoba bil jaktong krengdoo angming golpo ka-na sikbee mesokachim. Ua an-tangan saksa a-songtangko, mandetangrangko gipinni nokkol ong-atna sikjachim! Janapaha, "Chengo angaba dambepittionin, duk chakbee dal-bagipa. Ua dukrangko duk minggija, sahep gipokrangni napbao, ku-cholsan ong-e warachakani pal, jatangko bamchina al on-gipa A-chik dilgiparangko gisik ra-baoa, angade bika ding-baaia". Indakode skangonin an-chingni jatoba indakgipa namgijagipa, jatangko



pale bote nokma raja ong-giparang dongakonmo Atchu? "Agannan nangjajok; indakgipa manderangni giminsande A-chik jatde tangja. Saobade, banobade namgipa manderangba donga. Gisik sinabe, ka-a be-nabe. Namgijani bite bang-e baija", ine Sanja aganangchaaha. Ong-gimin obostaranko chanchiatpila gita Sanja rang-san niwilwale wagam chikmijile sambao rong-te nikako til-e goataha. Atchu Sanjani somoiode, rama jal-ang dongja, telegram telephone dongjana. Bobil dingna ku-mongode, songsa songgipinona mande sruk watatesa sal manchiana. Bobilna matkol cho-sonaba songni pante chadamberang chrochro dakaiachimna. Meli-nangrimpagija manderangkode gitok sote, mangkimaataiana. Bichal achal grian, denggu ma-su daktekiparangkode time sottongaia, ine Sanja Atchu ka-kim ka-kim ro-en golpo ka-angaha. Saksa lengotta gangipa atchuni chanchia aro agana badita gamchata. A-sel donga : Sanjani chasongo biltingtingchi dakgrikani chasong! Chasongni kri uamangni chanchiani, ka-dongani, jattangni matgrik inchaknang jaktong krenganiko hisape niode, ua atchumangni chasongo bang-a ku-mong-nangrime kam ka-giparangba dongakon ine an-tangde chanchibamana. Da-o uamanga bachitokjok?

Anti-a-kang cha-ako bano maikai ong-achim sandion, Atchu Sanja indine aganaha : "Kaisim ole cha-a Nogil antichakoha. Mitama Damra anticha doangtokana. Na-kam bilsil ola Nogil antichakon da-ning! Jal-ik, e-ching, kil ole pala i-chaan". Da-oko chanchiatoa, kilometre sotchet mangde re-nananga. Uan ja-achi re-tekteke anti cha-an salrang! British saheprang bon-tilonge chon-tilonge A-chik A-songko dokkol ka-na man-kujachim ina. Atchu Sanjani pilak golporang bilsil ritchasa sotbonga skangni kattarang! Badita me-a me-chik, pante-nomil, songni nokni mikkim dongkalgipa, mikasal matabol, matgrikrang gipinni nokkol ong-na sikjachim, ine Atchu Sanja mikchi u-site agananguaha. Saksa sakgni A-chik manderanko ua gisik mikrono nikatenga gita, uamangni jatangko al on-e, an-tangmangna Britishrang-oniko maiba man-dapanina kam ka-gipa badiaba badiaba Laskor, Sordar dakgiparangni bimingrangko minge on-aha. Uamangni

bimingrang saksannin biming minggnigni ong-ani gimin da-o gisik ra-atja. Indakeba ua aganangaha, “Simsang chibisik jol, Rangmalgre, Mandalgre, uchi samtangtang aro kosakchi Nongal soktike, ong-onbapile, Arbela, Nokrek a-biding jolni A-chikrang namen ka-raka; jattangni a-na china sanaltoa, dingsoa den-soachim. Salgipengchapakni aksa mandeha, rama nikgija dakgijako pinikbrue, rimbadi slai godilata, mande sidilata. Songgimik nokgimik, mi jam jipu jipu dongpagiparangko British sipairang so-rurue so-prake gala. Mat mese bi-sarangko gita doke sate bamatahaba!”

British saheprang A-chik A-songko dokkol ka-a matchotkuja. Mitam A-chik dilgiparang maibakai altuae bamaiaha; indiba tokrang tokchang dake bamgijagipa songni nokni chra depanterang, matgrik bilakgiparang aro songni nokni matabol ambi atchurang maming saloba gipinni nokkol ong-na sikjae, raken dinganguaha ine agana. Mitam biaprango A-chik dilgiparangna maiba maiba dal-kala kamrangko on-e jakkale, gipok sason ka-giparang budirangko chalaie, ua A-chik dilgiparangni jakchin gipin manderangkoba gisik nom-domatahana. Ua somoioba an-tangnasan lapko rike jatko pale cha-giparang dongachimna. Ia namgijagipa A-chik chol donggiparang, an-tangtangni jat an-chiskako jawana bamtektekna al on-giparang ong-akon? Indioba uarangko nigope chanchie gisik su-dikdikaton, nikna man-gen-ia A-chik A-songni bijatchi Nepal den-ram prap dal-gipaoni, Simsang chijol Simsanggre, Rangmalgre, Mandalgre aro uchi Nongal Bibrani diltugipa biaprango, buringrango songdonggipa A-chik manderang, nokdangrang pilakan rang-sande gipinna bamjaha ine u-ina bang-bea sakkirang dongkuenga. Da-alona kingkingba ua songrango donggipa A-chikrango A-chikni dakbewal rikbewal, ka-rakani jegalani gun dongkuenga ine nikata.

Atchu Sanjani agana kattarang chanchiako ong-katata aro da-aloba nipilna cholko on-a. Bebe, ia salona kingkingba ua aganbagimin jolrango donggipa A-chik ripengrang ka-rakkuenga, jera ra-kuenga. A-chik ma-gitcham pagitchamrangni mania bewalrangko ripingengkuako nikatna man-a. Mingsaosan olgrokangenga : “Meli-nangrimao”.

Basakoba gronge golpo ka-tainamo, Atchu, ine angni aganon, uade golpo matchotkujani gimin golpo ka-angkuakon namnikengachim. Anga chanchiskaa, bils ritcha bate chasong pangpilgiminko nipilatani kattade wal sal dondikgija aganoba bon-jawa. Angade re-a mikkangchiko re-angkuna chel-beenga aro maidakgipa obostaranko grongkugen? Angni re-bagimin ramachi mikkange Atchu Sanja sel-u chokot kottanie ja-achi re-angengaha. Mikchidingding dake anga uni re-angnasigipa ramaranko nipil nipile, Turaona re-bataiengaha.

Ian angni gari dondike dikdiksa neng-takmitingo Atchu Sanjako grongani katta. Haida ua Atchu budepaan Sanja Manda Sangma ong-akon? Bebeko aganode, uaba angni jumango--saljumango--nikbaasa.

Ua biaponi re-chakatbae, anga sal dobaahani gimin garion on-tisa tusidimuangaha. Re-bae, re-bae anga Selbalgre Rengsangre sambajolona sokaha. April ja ong-ani gimin a-barango mi ritchok ritchok chabaarangko nikataha. A-ba so-ani kamspa bolitchongrangko chong-mrot chong-mrot dake, a-ba nokgiparang chimongtokengaha. Gal-da, me-rakku ine gogiparangba bijak jakgni naengaha. Songni bi-sa chadamberang a-batangna jamdap riktokenga, nokking pintokenga. Mitama bol salakimo mesal ra-angako enge cha-e, lau dokraoniko chi ringtokenga aro ohojolatenga. Salde raka, indiba balba nange ka-sina. A-brini bi-sa ong-e, silni tala batio, glasso chi ringchakana aro mi cha-chakana bate, lautokni chi ka-sin aro e-salo chu-tepa mi baditan cha-to ringtobata! Nikate anga namen kusi ong-atara! A-brini mande, a-brini jat, je gnang uno chu-ongnike kusi aro jakgitelo ua somoio janggi tangtokengara! A-ba nageng chiringkolni ka-sina chikjima chiko sawa wa-a sottonge, chidare chokot changataoniko da-oba chi ko-dotaie mesal cha-mananiko neng-takenga. Nie roe aro an-tangkoba uamang gitan ong-atpae kusi ong-chakako maiko agankuna! Meatamna me-su am-joljole re-bagipa ambi buchumako nikata. Mikkang sikrepjok, dil-dil dal-dal dake arobak, su-chengkil kambarangko jakkepe ra-baenga. Chola china dongja, bimangtangon salni ding-ako, mikka wachiko ra-chaka. Maikai baichong-motgen mande! Indiba na-a aro

anga salna chatta wingipa, ba-ra kancha chingipasa saa ding-a jobot. Maina indake ong-asai! Dal-bea chanchiako iaba naata. Da-o skia man-ahaoa, bang-en neng-nikani dongjok. Bilni kamko ka-a dongangjajok. Jaksi gong-sachiba kam ka-na gong-jajok. Wa-sing weng-sa sottongjajok,du-a dingsa chitna changjajok! Complain ka-asa kakket. Ja-pa a-mang nangjajok. Buring napna pa-jajok. Dos mai? Skie ra-an baksa, bilni jakni kam namen gamchata ine u-ioba u-ina simsakjajok. Biap a-damtang, chiring chigatang ine sandi-ripinge songdong a-chana gualengjok. Samtangtango pangchakgrike janggi tangani cholrangkon gimaatbaengjok. Gisik mikgittalo chanchiroroe, da-ode anga Turachi mikkange re-bapilengjok. Chanchianide bon-baja; da-o re-mikkangsa.

Noktangona sokeon, salmatchi batjok, sal gonggeangjok. Attamo seng-gnangkale tusina chanchioba, tusina man-ningjaha. Walpaksa neng-pile an-pil ketchie tusiengon, anga jumangchide Atchuni aganatgipa A-chikrangni anti a-kang re-gipachi sokangjok. Nogil antiona awa Sisobra joloni seng-sot ga-sot re-genchimoba, da-oni kilometre 80 mang ong-genkon ine chamatenga. Songni manderang maikai anti re-o tarisoa pilakkon nikbaa. Palna botna nanggipa bosturangko jenggerango gapate, kok kerangrango ole kee jinma jinma me-a, me-chik, pante desa aro songni me-aparang anti re-angenga. Uchi songonaba, bobil gnal sokona, wal-a chia jokona mitam choligiparangko songo dongrikatenga. Ramao cha-na al-ikka, merong uarangko nokmechikrang e-salo tepe tepe olgiparangni kok kerarango on-attokenga. Songoni chakatbaon, me-chik desarangko jangchi done, mikkang ki-sang re-dil-sachakgipa donge, songni ramako rue rue ong-onbaenga. Jumango uamangni indake re-angako nieba kra-ma-gapnikbejok. Walna skangan badiaba biapo waltuani a-tip dakna am-engga. Budepakalgipa salakkim bolgongdap okkimaao, bangtala biapko basee uanon seng-gnang a-tip taridilenga. Ua skanggipa a-tip Arbela a-brini okkurion ong-a. Simsang chi ta-siri jokangenga; ukon ko-e mi chi song-engga. Biap bicham bol bijak den-dape panterang antokenga. Mitama bolcheksi wa-cheksi a-bolna kolamenga. Gantong sote, wa-al gope donna tarienga. Me-chik

me·a melie mi sam song·atenga. Dolprako sakchibonga, sakkolgrik komija. Apsan meatam cha·tokenga. Seng·gnang balgnang walna skang cha·mano, sada dol·e ringtokenga. Saoba gongmina ra·bitako doke roatenga. Iaba nambegipa tom·dakani, gronggrike cha·rim·ringrimani, rorimani ine anga chanchiatenga.

Anti a·kang re·osa, obostani kri somoi re·atani, knae gisik an·saoatani chol ong·a; mingsara an·tangtangni atchu ambini kattarangko giproroatani ong·a da·nang, ine anga nikata. Gimikande katta aganna doro ring·na saptokaija. Kattarangko golponi kri ritchurikrikangna aro sul melima·gape golpo bon·changatgija. Iaba sea·jota grioba A·chikni ku·tangko ripingani gun.

Waltingangoa, Katta aganna changgipa tugangborae, awa Balwa, awa Dikkimangni Kattako bitbatgija wengwatgija aganangenga. Gusukremtaitaie agangipani Katta minga ga·suangana jinma jinma ku·chakatenga. A·ning mitapsni, chiga chiningsniko Dikki Bandimangni re·angani gam·ako “tairimrim tairimrim” ine mingangon, jinmaba tusia paksa mikgittal paksachi ku·chakatenga. Badita waltinga indigitaan Katta agana ga·suroroangenga.

Da·o gita sea·jota donggijaba, atchu ambini Kattako ku·siko bil·tome roaigija, gipatna ripingna, agan·ku·skie donangnara, mande gitcamrango taning bang·na nanga”, ine anga jumango chanchibaenga. Somoi salko indin re·ataigija, anti a·kang re·o, gitcam jatni gamchatgipa jatni bebera·a, mania aro dakbewalrangko indake chasongna ripingbaaniara, da·o see jote donna changgiparangna dal·bea ra·biani gita angade chanchibaenga.

Songsani manderang ong·ja; songsongantioni Nogil antiko cha·na re·batokenga. Gronggrikenga tua a·tiprangon. Songsa songgipino saa·sia cham·a bon·a, gro·a·sel, mandeni janggi tangani pilak nangchapgipa kattarangko ku·on·agangrike katta meligrike, nama namja ku·patttigrike re·angtoka. Sal ding·ako ding·nikja, rama chel·ako chel·nikja; jinma jinma

re-rimangtoka. Mia misi bitchilrangko inagita, ge-a gamani bitchilrangko awa antio ra-bana, amintang grongo on-etna ku-rachakrika.

Da-oko jumang nikaton, A-chikrang u-iako u-ija dake, ma-siatangko an-tangkon parakna pa-jae, ku-sik do-ga ogija, kolomtangko sena-jotna jakkalgija dongako nikata. Da-oko chanchiode, rokomari cholrangchi, ma-ambini ma-bidingni, jatni an-chini, chi-a toa kattarangko ripingani ong-achimkon?

Chasong re-angaha aro gipin chasong re-baenga. Obostarang dintangaha aro dintangangkugen. Jatni nama dakbewal, ja-dil sikkimin jakkalanirang, agananirang aro manianirang bon-tok chon-toke gimaani ong-ja. Jatni krongrang-chra mongting wa-ge ja-tingrang, awa ma-bitchini ma-ambini nokgiparang, namchik jakpa, gri sokchi, noa namchik, chra angde pilaknan titikgimin dakna nanggni kamrang gnangchim an-ching A-chiko. Da-o bachin grang chae bilangnasia? Anga an-tangde ka-donga gnang nichaksoenga. Ja-dil ja-pang gimana gimana dakangengoba, chasong bawile bimangtangona A-chikrang ong-epilgenkon? Chanchiatenga!

Iachi mitam pante awalekrangba awa gongmina doke rotokenga. Mitama wa-ko bangsi putoke, sike rotokenga. Saobara gonda doke roenga. Badiaba mama adaranga nona namchikna, baoba am-e nike ra-bajolna manchiangenga. Aganangenga, mikkang antio, grongo namsango, ramao jal-ango, anti cha-na re-bao, me-asako siktate ra-bajolna gisik ma-tang chanchigiparangba anti re-angtokenga. Saobara nikgrik nigrika gita mikkang ma-sina skeba demechiktangko rimbitangenga.

Mi bitchil, misi bitchil, genasi, nakap, radiapi, rokomari bitchilrangko sandie ra-bana manchienga. Katta bo-na changgiparang jinmako kusi ong-e ka-dingdilenga. Rokomari gronggrike, tom-dake, pring seng-mitchibaon. Arbela a-tiponi chakatangtaienga. Re-bae uamang Chidare Bokmao sokeaha.

Chidare Bokmao chidare ponggni gonggrot, ta-rakbee jokenga. Uni sambao a-dam ra-e song-enga chanenga. Mejal attam gitan walko re-atenga. Tusigipa neng-e tujok. Mikrakgipa

sada dol·ako seng·wat bila bila ringtokenga. Knalde Nogil anti sokgnok. Uni walode jajongba nambee teng·enga. Salgi tangsim ronggrikao hajal askirangba mikjret, mikjap dake nionatenga. Anti re·bagipao, saksa pante gnang. Uade jinmao rooba rosiksak dongsiksak dakari dongenga. A·tipo nomil sakgni dongpagipaoni saksana gisiko chanchie somoi re·atenga. Anti a·kang re·ao basakobade indakeba ong·akon ine nikbaenga. Uani kattakode intangosa dingtangmancha ja·rike niaignok, ine angade chanchiangenga.

Pringwalni chakate pilakan arobatai bil·sa Nogil anti sokna mepring cha·galgale re·angtokenga; maina attamode a·tip dake, seng·gnang balgnang antion waltukuna nanggen. Pring seng·o Nogil antidamo ola keatangtangko bostuna srena chamtokenga, dontokenga. Doltangtang a·tiptangtangan damsan song·e chane cha·e tunasienga. Awa A·bengchini mande, saobara Matchi jolni mande, joltangtang gita, gronggrike gopsop ka·eba somoi re·attokenga. Me·chik desarang gana re·king pal·tang gantoka aro me·asaranga gando lengotta ganachek; indimangba maming misil mikkratani gri namen rotok dongtokengachim.

Nogil anti A·chik A·songni saliramo a·kawejolo ong·ani gimin rori banggal ja·golangsi bang·a; a·kaweo man·gipa bosturangko ra·bae antio palna a·bachengmiting. A·chikrangde na·kam bilsil olna, kari bilsina minge anti re·angbata. Banggalrang gakgu gakjak A·chik ku·sik agane nina jotton ka·tokenga.

A·chikrangba Banggal ku·sik ku·sa ku·gni aganna sningtokbaenga. Basakoba basakobade dolgnian u·ina man·grikjaenga. Ua bilsil salrangmitingo indakeba choliattokenga. Pala sim·a sregrik ra·grik dake matchotman·o, songtang noktang pil·na ine mande sko chane simsake re·diligiparang jinmako dilbataengjok. Kari palgiparang a·kaweni Banggal gitchu, na·kam palgiparangba uamangan. A·chikde na·kam rame cha·kuja; Banggalsa na·kam rame cha·chenga palchenga. Na·kam palgiparang rorirang gitchu. A·chikrangde ripoe ba gittang so·e cha·aiachim ina. A·chikranga na·kam bilsil dattoka. Wachijoko rama bring dikani gimin,

mongma matcha jalani gimin, namen anti a·kang re·na kenbegni ramarang ong·achim. Ru·at tampi bang·a. Alda nokrang dongjachim. Chanchiate, badita neng·bee indita sal ramarangko re·baesa nanganirangko man·a. Da·o banona sokaha? Aiao! Uarangkode nipilato jumang jumangsa angade nikatenga. Anggitan uarangko chanchibewale nipagipa A·chik manderangba dongenggenkon? See·jote rakkiade gri, poraia gripitti; indiba A·chikni ong·anggimin itihang pangnaba gimajawa. Ku·oni ku·ona, pagipa ma·gipaoni degipaona, degipaoni su·ona deona aganritingbaemangba A·chik uko rakkibaenga. Golpo aganachi, wal·tim roao, mela mangdongao gronggrike, chasong re·baa re·angako nikrikpana an·chingba man·pae rasong chabeani ong·a. Taning an·chingo donga; jakkalna chol ong·kujama? Anga jumang gita nikbaoba, obostade uan chong·mot ine mikgittaloba nika. Chasongni kri obostarangko re·gronge an·chingko ianona da·alo sokbaatgipa atchu ambimangna maichi gro chotgen?

## **NIPILATON RITCHA BILSIRANG :**

### **Chadambe Saksa**

Indakeba ong·a. Chengo Nogil anti cha·na re·ange re·bapilo, pante jinma wekoba wekpaja, ka·dingako nikesa ka·dingpaata dake, jinmao asongpae roenggipa pante chadambede maikon ning·tube chanchiengasai! Chanchian ta·rakbeenga gita anga nikbaa. Ukon angade ja·rike niangenga. Ia pante matte dakgipade ong·jane; uni gisikode dal·en jattang a·songtangna chanchibeani donga.

Nogil anti cha·na re·angon, uade pala, breasrea, iarangkode dakgija, A·chik jinmani anti cha·na re·ango mai mai gital dakbewal cholonrangko skibaenga, man·baenga, gital cha·a ringani bewalrang aro rorirangni tol·bokbokako man·e, maikai gisik brangenga aro unan gisik nom·angenga, ukosa nichokkibeenga. An·tangtang A·chik gita gisik sronge chanchiaienggen ine chanchiari, ropa chopakon bebera·tokenga; ukosa ia pantede nichokkie chanchienga. Anti re·a rikkit maiba gital namgijagipa dakbewalrangko man·baengama ukoba sriksrik nirikenga. Indakmitingo, soa



sima golporangko ka-e, balchigranggrang napilep ku-pilep dake rotelaigipa pante saksakoba uno nikbaa. Ua A-chik pantede, rorirangming joribake, jawarangnasa lap daktime, palanirangko rorirangnasa dam sikona sikdoa dake bikpil kam ka-enga. Jatangna, a-songtangna, songtang-noktangna mai namgijani ong-genchim, on-tisaba sa-dik-chanchiani dongja. Ua denggude songo-nokoba tik gri dake, rorame cha-gipa saksa Bokbok ingipa ong-ana. Namgipa, chanchininggipa pantede Bokbokni kamrangko nidikbaenga. Songni nokni manderangko Bokbokni cha-bokako, ua pante ninan ambajaengjok. Mai cholko dake, iarangko champengsona man-gen, namgipa pantede chanchibeenga.

Name chanchigipana pangnan cholde donga; donggijakoba dongatna nanggen. Namgipa panteni bimingko Ka-san mingana. Bimingna kraen ua gipinrangna, mongsongbate jat-an-china ka-sabea ina.

Songchi-nokchi sokpilo, Ka-san ka-sinsin maikoba dakna chanchienga. Songni Nokpanteo pante jinma tuna gadotokon, Ka-san nikbaatang, nirikatang aro mikkangchi ong-bagni obostarangni gimin, tugangborae attamantin golpodilenga. Walsa ong-ja walgni ong-ja, walantian uarangan Nokpanteo golpo. Da-o panterang namen chanchina a-bachenge, apsan gisik ong-angengjok. "A-gittal rorirangni dakbewalrangko ja-rike, cha-bokani aro kong-keske chalakki dakanirangko an-ching A-chikde dakjana", ine Ka-san ripengskarangko ku-mongenga. "Indakgipa mande an-ching giseponin ong-katode, jinma jegalna; maina uaba A-chikni bewalo gita, jatna signi ong-gen", Ka-san aganenga. Panterang golpomitingoba, mitam mitam jakni kamrangko ka-joljolenga; watenga chengenga, bimang sol-enga. Mitam aganenga, Bokbok an-tangko namatjaode, uko galsrangna. Chetchat chetchat, chanchiatangtang gitan aganenga.

Indakmiting chachao, Bokbok Nokpanteona gadobae, saksako doktopeon, jinmarang uko nina siggija mikgitchingchi niattokenga. Saksade saksa nidika amjae, Bokbokko bilma bilma dokatsrangjok. "Rorina mikpakma nikande nang-maba nang-koa neng-jaba; jat a-song chatchi ba-beko sankan

nikansa,nang·maba dingding ku·dimamingba;gualjok, Bokbok!" ine Saneng inatenga. "A·chik ma·giparang dingding-ka·dinge, bi·satangna sokkane aldue, ja·pingtangko ki·gong chane, okgimu algimueba, deko sa·ko skiaba. Dal·ang chuang, a·song chigatangko nirok-sandibo, ama anona chel·chakbo, rim·chakbo inako, Bokbok, da·on na·ade gualjokma?" ine Ka·sanba ka·kime aganatenga. Unon Bokbok ingrimako man·e, on·tisa jada sie dongani ja·mano, draen jinmaming asongpa·brokjok. Bokbok da·o an·tangni gualako nikatakon; ba maming namgijako miksongjaoba indin bokboke nengrabee janggi tanggipa pante ong·akon. Jeba ong·china, ma·siatako man·e, Bokbok da·o jinma baksan chanchiao apsan ong·panakenga.

Da·o Bokboko atchiramna, ba·rima ba·saana ka·saani gisik napbaenga. Songni chiring chiga, buring bolgrimrang, tangsek a·brirang dingtang bimang gita Bokbokni mikronna ong·nakenga. Salsalantio Ka·sanni agangipa kattarangko agantaitaienga gita, knataitaienga gita, uni nachikkolo ganti ringringenga. Pante desaskarangba uko da·ode mittele aganbaenga. Gisik pil·baan baksa, bilsu brikalbajok aro ning·tue chanchianirang sokbaengjok. Haida, ja·manchide rongjrie chanchigipa chadambe saksa ong·naba donga. Badine agano mai miksongani, badine agane maia budi chalak dakengasa, Bokbokde roriming baju bakmitingon ma·sie ra·aha ina. Da·ode che·em che·em chanchibewalesa, nipil niksot dakesa uade niskaengahana. Ka·san, Bokbokko saksa jakkaltogipa ong·gen ine niksoenga. Ku·sik gam·brebregija tom·ao asongpae, namakoba "Oe", namjakoba "Oe" ine ra·chakaigipa ripengrangna bate nambata ine Ka·san niksoenga. "Hudu huda dake kattatangko minokpilgipa manderangde, da·obatai namtaija ine A·chikrangde aganronga", Ka·san chanchibeenga.

Adita ripengrangko da·o Ka·san man·angenga. Walwalantin Nokpanteon a·songni jatni obostarangni gimin panterang golpotokenga. "Jawa gipinrangde baoni a·tangna chitangna gita ka·sagen. Cha·a raja cha·e, ringa raja ringe, cho·e wang·e, morokroke pilakkon ra·angaigen", Saneng tapa gita agandapatenga. Basakobade jatangni mitam manderangkoba

jaksi otate mesoktokenga. Uamang gita dakpaaiaora ine pil-sa chanchia jegala dakpile sal wal re-atenga. Indiba man-ja! Da-al nang-ni cha-ako, da-al nang-ni maha maha dakdilakode, knal haidade! Mai tik! Ka-ara amja bilara sokja dake jinma jinma ji-ja ji-ja Nokpanteon golporongenga.

Aganani bon-jawa, sai-intekani ong-aigen ineba pante ma-sia. Uni gisiko dakgrikenga. Indakgipa nokdangrangni manderangkoba sakantikon minge minge gisiko tikkit tikkit chane niatenga. “Namja” ine nikatenga. Ding-ol gramchichi ku-sa rongsa cha-aba baditan kusi! Ugita apsan chanchigipa manderangba bang-a ine nikata; indiba namgijagiparangan pakma. Ong-gijanade pante maming saloba gipinna bamjawa. Jeba ong-kan aganenga. Tip Tip gokarekgok. Wal seng-baengjok, do-bipa changra gisikatenga. Tua paksa, mikgittal samsa mikrakbaenga.

Unomiting chasongode, A-chikrang ge-o gamoba, mia misi man-paa; a-a mitim dongeming gamo-ge-o indinari ong-ja. Pante desa gamu gong-a, a-ba a-tot dakpaa, korostangkode amao apao nengnengari bi-na nangja. Songgimik sarako duule nok rikmiting; nokni ro-aba mik sotdok, mik sotchet ong-eng. Cha-u me-pu inditaja. Songni mi jamrangkode song a-gateosa jinmaan riktoko, mi-misi paktoka. A-selde songo noko wal-jok chijokoa, okgimu algimu brangna kena A-chikrangde. A-gateo jam rikoba, jam do-ga chipari, dala tekna nangja. Inditan A-chikrangde Mini Amao, Misini Amao ka-donga. Uan, Rokkimemaan dongtimaigen, ine bebera-a. Uni ortode ua chasongo mande mandeskaoba ka-donggrikani donga.

Ka-san aro Sanengmangni chasong bilsiritcha batangjok. Uamangde lengti gana jaksibri; mande dal-a bolchaa, chananga; ku-rang ka-kima. Lekka skia dongpajaoba Ka-san mande mikkim chaa; troskarangba una bama. Ka-sanni ku-sa aganako namen gamchate ra-toka. Ma-na nona simsaka. A-song chigatangna matcha gitan rana. Nipilaton, re-anggin ritcha bilsirang! Indakgipa A-chik depanterango ma-a paaba, ano namchiktangrangba ka-donga. Uamang u-ia, “Jat, A-song ripingnade sanalnaba nanga, ra-binaba nanga aro niksamsonaba nanga”. Jumangatgija mikgittalo chanchi-

ning-tuatode, pilak nanggipa gunrang Ka-san aro Sanengni chasongon dongakon inmanpila.

Jumango anga chanchibaenga! Ua seng-gipa matgipa bilakgipa, bika rakgipa, chanchiao kimkingipa ong-na nanga. Anga an-tangba uko namen de-mittelpaenga, una ka-dongchakpaenga. Nipilate anga ritcha bilsinikosa jumango nikatenga. Indide da-aloba uni dea su-a dongchongmotenggen. Da-o uko sandie man-kugenma? Ua panteni an-chi bidingkode uni chal cholonrangkode saoba dedrang su-drangoni man-riknade nangtela ine chanchiata. Bimik nataia gita, dongde dongenggen ine ka-tongtango anga gam-brebregija betbete robaenga. Chasong re-angoba, ja-dil ja-pang rohirika, tangcharika, ge-songrika; ja-dil bakchotja! Uade dongakon ineba nikata.

A-chik A-songni a-mango, a-salo chatelaigipa sam bolrange, nirokgipa sandigipa chi rutimgipa griba, skatangan chaaia. Biapni kri, a-mangni kri, a-salni kri, a-koba jejawa. An-ching manderang an-tangtang nosto ka-e gimaatna jegita jotton ka-oba, mikka chisa chigni waatjokon ritimbaa singsolbaa gita. Chanchiode indake nikata, gimaatani kam pangnaba baija; gimaatna kam ka-giparang an-tangtangan gimapangpilaia ine agana gitan ong-chongmota. Bilsin bilsu re-angao nirike, indaken ong-aba ong-baenga; indiba dal-roroaniko dokchonnade man-bebea. Ong-telaiani bewalrangko an-ching ra-biode, an-chingan sipila. A-chik A-songni sam bolrang gimasrangnade man-jawakon ine pil-sa pil-sa chanchia. Uko chanchi-aganode, chasongsa nikbaako tangengpittion nikkuna ama. Atchu ambima-ang poraia skia grioba, salko jako nirike kam ka-na changa. Uamangoba niksoani gisikde dongchongmota! A-chik ong-pagijagipa manderangna sanalani donga. Mandeo sanalani, susaani aro ra-biani gisik dongjaode, ua tol-orot ichi uchi ong-jawa, gisik do-tekmea. Uko niksengjawa. Indaken A-chik jatoba a-na china, a-songna chigana sanalsoani chengonin donga, ine nikna man-a. Iani a-selsa awa Saliramchi Rori a-song, Salgipengo Rori a-song aro Salgro-Salaramo Rori aro gipin ma-malni a-brini manderangni donggisepako man-gipa A-chik A-song chongipa ong-aioba, A-chikrang da-oba

jatni dakbewal rikbewal, manibewalrangko gualgijan ripingbaenga.

Basakoba basakoba ong-telaia bewalrangchi a-gilsakode obostako mesoksoa. Bilsil ritchachi-chet sotskusni, June jani chi-gnigipa tariko A-chik A-songo dal-begipa banggrianiba ong-aha ine agana. Unomiting, “Sabo sarang, bisi kanchirangko ra-angchina” A-chikrang miterango bi-beahana. Mitam kritkuenga, mitam mitam torom gitalrangko ra-bamiting. Bang-a bang-ja gital gital toromrangko skigiparang ong-katna a-bachenga. Ka-san aro Sanengmangni Nokpanteni bewalrangko A-chikrang gualna gualna dakangenga. Gisik ka-sinangenga. Tong-kandi lekka skie ra-ari, ichiba uchiba ong-gija dake dakgipa A-chikrang atchinapbaenga. Tong-sa Bengali, tong-sa English ra-chape dal-batokenga. Ua somoi intal A-chik Ku-sikni chi-a toa, ga-sua aro mitimako uamang janggilitangenga. Rokomari jajaatani chasong ong-baenga. Kni ro-e dongipakode skul napna on-jawa ine agantokenga. Skie pattie on-gipa A-chik manderangde dongangjaengjok. Nipilaton, changsatai A-chikrang guang sringaoni ga-aktaitaia, maldotaitaia gita chasongsa re-angengaha.

Indakmitingo re-baaha 1950. Chasong dingtang nabajok. Ka-san aro Sanengni bitchri chae dal-roroe, dongspa A-chikrang dingtang melae tom-dake chanchiani ong-engjok, indiba biapde Nokpante ong-jajok. Obostani kri kri dal-bate chanchiram biap dingtang ong-engjok. Unomitingde na-aba chukale poraimiting ong-akon?

## **MATABENG PANTE**

Matabengni Pante Nangwan Marak ua salrango maikon chanchienga hai ja-rike nina. Uara jinma jinma anti a-kang re-o, Achikrang mai mai obostarangchi jatni chanchibewal dakbewal rikbewalrangko gual-jamangangenga uko name ning-tue niriksaenga. Angni nikbaode, ua gando pal-tak ganmiting; sisa gane, narikki gane, nachilo kil siksepe gangipa bilsil 21 ni pante. Ua Matabengni A-chik, uni gingting chua, mikking dal-a, kni ro-e dona aro kni bike kotip kadoreka. Pante mikkim chaa. Ja-patte jakpatte mong-sike dal-dala. Changroani

kri uni bitongba bil gnangsu gnangsu nika. Bang-a A-chik nomilrangan una mikchaoba, ramram samsam uni chanchiako parakja. Pante desaska uni mikkango ka-ding wakreke nachilakna pa-ja. Uo gisik aro bilba donga. Da-ororoni chasongo gita kang-kare dengdobik, pakkreng kom-cholchol dakja ine anga nikbaa. Ua rorirangko mikron niatna sikja. Raken a-song chigatangni gimin chanchigipa ong-akon. Saoba ra-biode, ua gipinna senggijan chagrongakode saksanba warachaka. A-song chigana ka-saani gimin ka-pake, a-na china sanala. Jumangchiba anga ua A-chik chadambeko nika, uni dakbewal, chal-cholon aro chanchiningani kamrangko mikchabec suk ong-beenga. Jumang gita nikaioba obostarang bimang mikkangrangko da-o nikoba Matabengni chadamberangko apsan Nangwan gita nikawai! Unon tusigijaba jumang! Jumang mikgittalsakon! Chasongni re-engani kri, indakeba basakobade apsan; basakobara dintang ong-engode ta-raken nipiltaie jat a-song ja-ku de-na nangengjok.

## **ANTI WEBAPILA**

Brea srea matchoto, da-ode Nogil antioni songtangtangchi pil-batokenga. Uamang saldok waldokmangde anti cha-na re-on sal re-atna nangachimna. Apsan re-bagimin a-tip, ramajal-anrang gita damsan re-pilangna nangana. Meja a-tip dongbagipaona sokon, biap bicham tarie, meatam mepring song-e, songchi doangtaienga. Nogil antioniko na-kam chelna wachek ingipako pa-ang pa-ang me-chi kapachim. Unomitingde na-kam namaan bakon ra-breng! Am-bol kokkrengo ola gita sike olna man-pila ine agantoka-golpotoka. Ukoba palao tojana; mande gengwange on-ao badita ja-a sepa indakesa sreana. Na-kam mitimara ji-jo ji-jo! Uko jumango nikbaenba anga ku-chi mittapmanpilenga. Hai, da-oko niatskana. Ua salrang dongjahakon! Pilakchin bilding bildang ong-e ia na-kam na-so bebeonaba sokahakon! Chanchiate, badita bilsirang re-angmano obostarang dintangbejok? Aro maina?

## **CHIDARE BOKMA**

Anti a-kang re-oba, brin-bawe nangchapchapgipa golporang bang-bea. Chengo Nogil anti cha-na re-angmitingo,

Chidare Bokmao waltuangan walo angni nikbagipa pante saksani gimin skangan janapba-manjok. Ua pantede songoni re-chakatbaonin, saksa nomilnasa gisik on-babeenga. Nomil ua panteni songsulonin ong-ana; a-sul songsul ong-oba jringnade grongna man-jana, maina ua chasongode niam rakbea. Pante kang-kare rakosa, nomil katta meliosa seke katode, song chel-kalachi seke-bale kattokanakon. Uamangde indita bika rakkuja aro chanchisoaba dongja. Tingring nomil bi-sa, bilsa chi-bongapitti aro pante Mingnen bilsa chi-snimang ong-aiengpitti. Tingring nomil te-rokbal, chono chonbreja, mikterokrok; kni ro-a aro kesot bakjak done kni bikatode silaba sila. An-gil nama; penateng gitchakanan chikwake cha-o tosu tosu nikmanpila. Sisa gane, nabibal il-eng pil-eng dake ganmaia; pante desa mikchasu mikchasu nikataia. Mingnen an-tangba A-chik pantena kra kra bilming jakming rake dal-drobamiting.

Hai nina, Chidare Bokmao waltuangan walo ua pante maikon chanchienga. Un walode jajongba jarambong; salgi tangsim pang-sangsang; bangbango askirang ching-chet rikrak mikjapenga. Somoi attamprang aro obostade ua pantenade da-nang! Pantede chanchian ong-gekaiengjok. Jajongkon uni mikchagipa nomil ganda, askirangkon nomilni ripeng baju dimbrarang gita pantede chanchia. Balwa balsrisri balbaakon, Tingring nomilsa ka-srisri okamenga ganda pantede knabingbange, an-pile ketchie niwilwalskaenga. Basakon walba seng-gnoksai, pante chanchibeenga. Bol pangsaos dan-danari saksanba jaksi pe-krep pe-krepe wal re-atenga. A-tipo waltugiparangde hengkok ra-pile, mitama putput pat pat rang-spoe tusitokenga. Do-gisika buringni do-mesal changsa, pante tusipakuja; gnigipa do-gisikako knana skangan pantede bolo dan-dana baibai tusingkaengjok.

Pringo chakatninggipa me-apa tokaparang, wa-al gope donao, am-bol so-gate jrao jrao ching-baoa, sada dol-e ringchengenga. Mi sam song-na mepring seng-gnang cha-e re-chakatna ine de-mesatokenga, chamesatokenga. Saksaba saksana nisigrikgija, apan song-galgal changalgaltokenga. Jinma tom-dake cha-o mi napkala, bijak samjak jeba ong-chong tobate ga-subate nikaia, ine golpororoe cha-na taritokenga.

Pantede jajong napangpilosa bolo dan-danari tusiangahani gimin, pring seng-o gekgak gekgak jikjakana prikprak chakateming, miksubrakari mepal enge cha-paenga. Cha-manoa, kok olmak pinangtoke, koktangtangko ole re-chakatenga. Me-gol sote sol-ako, wa-treko chamos dakako, re-bapile waltutaio jakkalna ine bolmitik ja-tingo nomilrangba jotkete donangenga. Buring agal jokjakal ine me-apa budeparanga lautokni chiko de-e satkikidapangenga. Haida re-rimtok, jinma jinma Chidare Bokmaoni re-chakatangtaienga.

Pantede walgimik walmikrake tusia suk ong-ja ong-ja dake an-tang ra-bapagipa do-o kasi kokseprangko bal kae doleng doteng dake ripeangenga. Tingring nomil kerang gape sokkua minako srena olangpaenga.

Panteni an-tangna gisik on-engako ma-sipae, nomil bi-sa Tingringba gisik nom-ang nom-ang dakbaenga. Indakeba anti a-kang re-ao grong-namsanggrika; ukoba anga nikbaenga. Haida, do-si-do-dokaona sokearok? Bon-chotao maian ong-gensai? Jeba ong-bo, mama adasa jekoba chanchiaignok. Maina nona namchikna jora ripeng kae on-anide, mama adani ja-chok re-ani A-chikni dakbewal ong-a. Me-asani aro me-chikni dol agan-meligrika ong-ode, Mingnen aro Tingringde jikse ong-enggnokkon, bon-e nikbaja. Sal, ja aro bilsirang re-angahaoba, da-oko niatoba, A-chikrangni ua mancha dakbewalde gimakuja gita nikna man-ade man-engga. Nona namchikna angse am-ao, ja-chok re-engga; banoba mikgil sienga; banoba name name me-asani ma-drang me-chikni ma-drang meli-ma-gape dakengakon? Uanoba chra angde mama ada ma-na nona songsaro dal-bea kam ka-engako nike jumang ong-gija mikgitalo nikatpilenga.

## **GANA RE-KING, GANDO MAKKAL**

A-chik A-song namsang ding-gipa a-song ong-a. Sin-o sin-breja, ding-oba dongtopilgijade ding-ja. Haida ding-nikani a-selmanma ba mai a-selman A-chik me-chikrang ua chasongo gana re-king kal-tang ganachim. Me-asaranga gando pal-tak gantoka. Gana re-kingni apalani jakchi too krugni ong-a. Ja-ping



samsachipakko naate gana. Re·kingko seng·kio siksepa. Ola kea gngangba ukon gana; je somoioba ukon gana. Indimangba teng·kappile, nitoe krae asong ki·songna minengtrit dake changachim. Uamang sokna chelna pindapa chola dongja. 1962 bilsirangona kingking soka chela timbang timbang Tura anti cha·na re·bakuenga. Re·kingko A·chik me·chikrangan noktangtango, kang·kareo kae sing·o doktoka. Ku·te nitoriri kilding sakrema ba basakobara ripok gngang sika. Chengode kerka tarie kil jete, kilding rika. Bol ja·dil, bol bijak, laha·iarangchi rong sim·a. Bang·bata salon gitchakko tangsimchi gipeng sika; mitama tangsimko gitchakchi gipeng sikskae, re·grang sala. Namen chatgipa ba·ra. Uandaken gando·makkalkoba taria. Adita bilsirangnade indaken ong·angkuaigen ine anga chanchiaia.

Da·o ole kee Nogil antioni songtangtangchi pil·batokenga. Salgittam walgittam waltu·saldonge, a·tiptangtang soktaie doangpilenga. Amikka songni a·tip inode darangba sekja. Indaken songsongantin rama jal·angoba a·tip dongtoka.

Sokangaha songona; achak sing·soenga, bi·sa desa okchirippit nichaktoksoenga. Sal napango songko man·aha. Anti re·anggiparangni golpoko knana, songni manderang dobaenga. Gital gital koborrangko unosa man·sorongenga. Songni chiga ringram, chona chiring damsa ka·srisri jokangenga. Chiring chimikko chidare ponggni chana gngang. Pongsa kosakogipa chidareo me·chiksarang autokenga. Ka·machi pongsa changipa chidareo me·asarang autokenga. Me·chikrangni auako nikatode, mande re·pakangengane ingipa gita gusu kramesa me·asarang re·angtokenga. Me·asarauga auoba rim·kope autoka. Me·chikrangba kratcha·ako donpenge chigao ba·ra kanchako ro·ongo done auangenga. Au miksumano kokkarengo wa·sing gape gape chi oltokangenga. Indiba A·chikrang auade baditaba chang salo autoka. Be·en an·dil seengoba, uade da·o gita rokom chokom sabon to dongpajaesa da·nang! Sko su·a karitchichisa, to pila wak mitimchisa. Ua chasongni kr' kri, nitoe nangdange rotokengako anga nikbaa.

Attam ong-engjok; mitam song-a chana minjoko, cha-e ringe rotoka. Mitama noktango chu song-a chajokode ripeng okame damsan dikka wilwile asonge, nokkra balnangao, ong-jaoba sreko ringtokenga. Ua tom-dakaon, anti cha-na re-ani, anti re-pilbaani gopsop ka-ani ong-engjok. Me-apa tokapa tim-sa, pante rokrek chadamberangba tim-sa tom-dake ring-tokenga, kusi ong-eng-a, chanchiatangtangko aganenga. Uamang neng-ako neng-a minggija, pilak nikbaa nibaa, chagrongatangko bel-bele agane roenga. Pangnan indake tom-dake roode, saksade saksa gisik rongjrie, katta ma-sie chanchitegipa me-apa budepa, pante desarangba dongchongmotaia. Chengoba, skia poraia grigenchimoba, gisik ma-tang seng-gipa matgiparang A-chikoba dongake ine anga uamangni dakbewal rikbewal, sakantikon gisik mikronchi mikjumangataha. Da-alona re-bapile, chasongko niwatate, nipilate nion, uandakgipa mandeni bewalrangde dongbebekuenga ine anga sakki man-bebea.

### **AN·CHIDE AN·CHI**

Anga muni nangatako man-e, watja engja dakpile, ua chasongni A-chik manderangkon jumangantin ja-rikstapa. Chanchiata, uamangni dea su-a da-o bano?

Atchumang ambimangni dedrang su-dranga sal, ja, bilsirang aro chasong bawilango, dingtang gisik, dingtang manderang ong-tokahama? Pil-sa indineba inmana : "An-chide an-chi, an-chi biding man-rikanide, taning kotaning pangkamanide dongkunan nanga. Da-o ukoba gisik ra-ata. Gisik mitta, a-ning a-kol nikgiparangba ukode da-alba sandie nikaha. An-chingsa mikgitok ong-kuenga, sandina changjaenga, niato nikwatjaenga. Dosde an-chingon, nang-on angon ineba nikbaa. Anga an-tangba uamang jinmaming asongpae, chu ringgijaba chu peka gitan mikmakpae, neng-a amchakjae asonga srek pakmaon dan-dane tusiangaha.

### **MAMA JAKPA**

Pring seng-oa, anga pakmao dan-dana gnang tuangaiahakon ine an-tangan chanchiaha. Awa, A-chik nomilrangde mi sam song-engakon, pura su-an kimko

knaatenga. Noksachiba gam·enga, nokgipinoba purakon su·enga. Pring mikrako cha kapsa ringnaba jumangchi gisik ra·atenga. Cha chinide uamango don ꞑaja. Nokkra sa·ra wittokenga; mitama mi dando chu·tokenga. Srekoni ong·onange lau chi te·sa ra·e, noksamo miksugalgaloa, gisik srangbrang dake, an·selbate an·tangkon nikbaaha. Nokni budeparang ua salode a·bachi re·ang·doangjakon ine chanchie, uamang asongaona re·angpae rooa, katta gital knaa.

## **MAMA JAKPA SOKBAA**

Nokmani nokona ma·nok cha·na mamagipa jakpa sokbagenna; Nokmekhikni mamatangna. Chra angde re·chapbagiparangna maiko song·e chane sokachakgen chanchitokmiting. Mama jakpana minge jilgipa bilsisnini wak dal·bebeako, matchu a·grang gata simchian ruekpile dal·ako do·do do·regipurangko chame minge donsoenga. Pangnajringnade mama adaba sokna man·ja; gamao ge·ao kam matchotja, jakgitchaja.

Songni manderangba dakchakgrimtokna bewal gita jin·baenga. Jakaride uamangba re·baja. Noktango song·a mi, sam tepe ra·baenga. Iade bijak sam tokala ong·ja; an·tango je gnang on·pae ku·mongani bakko ra·bapaenga. Namjok ine angade kusi ong·chakata.

Attamchipak sokbaengjok Mama dal·gipa aro sakdok re·rikbagiparang. Mamagipa sel·u chokot kottanie, skang skang dobaenga; mitama mil·am jakkepa gnang; mitama ola kea gnang sokbabebetokengjokai! Do·amekba boloni bolona bilrroe, nokking bilsotsote miwek, miwek ine mejeksoenga.

Chengo ua songo mamagipa atchie dongbaa dal·baa. Songni nokni obostarangko nirorojolbaenga. Chanchibaenga uni troskarangni gimin. Bilsu ruutani ja·manoba, an·tang aurggipa chigao dongdipe, nipilattaie, chanchia gnang ja·sumiksusrokangenga. Ua chidareni chiko tobate nikangenga. Uni jik kimna skang ringanggipa chigani chiko ringtaiangkuenga. Bi·sani salrangko nipilattaie, mamagipani gisiko chanchianirang, gisik ra·atanirangba nabatokenga. Skango

pani ma-ni dongmitingo narang, kampil, te-brong te-gatchu  
 grim grim donggiparang da-o bite nanga komiangako nike  
 chanchiangenga. Obostani kri, mama dal-gipa ma-ate,  
 mikchikkimbee ma-ani nokchi dogatangenga. Nokkra sa-tila  
 sokoa, amani appani Kimako nikechenge, uno chadengdike  
 jrimjrim mikchi u-site dringchi napangengaha. Namchikgipani  
 segipa jako rim-e salamsonga aro songni nokni manderangba.  
 Bilsisni song-a gura dal-a diktomko dringon donsoa gnan.  
 Nokmechikni segipa mora am-pok sale on-soenga. Nambatgipa  
 biapo Mamatangko asongatpaenga. Nok dal-e ro-e miksotchet  
 rikani gimin dring dal-a aro sambengo chi ka-sinarangko  
 donsoaba gnan. Chasongni kri songko nokko kobor on-a gita  
 nagra chimatenga. Iaba kusi ine angade mikron okkapile  
 nipaenga. Songo nokoba chu chekna changbegiparang  
 saobarangde gnan; saksani bimingde Awek. Awek chu cheka  
 jakrako we-e namchikgipana pong de-e on-atenga. Uchiara  
 namchiktang ka-sariri re-ange, mamatangna chu  
 kanchengenga. Asongpagiparangna bilsa dal-bataoni dran dran,  
 sulsul pongonikon namchiktang chu kantokenga. Gitoko grang  
 grang kek kek ine ringate, kusi ong-tokenga. Indakmitingo  
 jongagrirang wak donsoako su-bebejok, matchu jengo gatako  
 den-bebejok. Re-sal ja-chraprangko antale uamangde ratenga  
 tetenga. Melie golpoe kam dangdikako nikoa, an-tangde  
 jumangchiba an-sengchakbabejok, ga-nangnikbabejok!  
 Song-giparang song-enga, tepgiparang tepenga. Wak matchu  
 bikarangkode skang rate, jal-ik e-ching chipe namedaken  
 song-attokenga. Song-a mindaldalako kapa sadaldalako re-su  
 ringkong sotaosacheng-atcliffe, mamatangmangna  
 namchikgipa du-chengenga on-chengenga. Namchiktangni  
 sachiako mamagipamaang chu baksa cha-chimenga. Unon  
 anga nie nie dongoba, aditan nokdang nampagipani nok ine  
 u-ibaa. Uchi me-bram geda gil-oktokenga; pura wanti  
 song-tokenga. Noksam nokgil similaba gingsipangpang daka.  
 Awa alot ka-ako wak be-en aro bibikming brengtokenga. Song-a  
 bibanan okkabapilenga. Song-a chana matchoto sokgipana  
 mamatangna mitin chitinna taritokenga. Sam song-an rokom;  
 waksri jakpasa ro-e gitachakrairai jo-bebejok; uade mande ra-ani.

Matchu be-en bika brine song-tata. Matchu bandal e-ching siksimile song-a. Wak geda pura pattisa, me-a meseng wak, do-o dambe dambeko wa-singo rikkeng dambeng brengtoka aro mia mema gorimko song-a. Song-jok ritjok, brengjok, kaptatjok. Sawa jekuna. Da-ogita rangtal dongja, gilasa dongja. E-salan rangtal, wa-singan gilasa. Sachibebekjok, soka chaktokjok. Mamako adako mande ra-aba namen kraaha ine nirike roaienga angade. Mamagipaba mepal enge, an-tangna sachiako cha-jok ringjok aro pilak kam ka-pagipa songni nokni manderangba dol dol cha-engga, ringenga. Ua chasongode jilatang kem-atangko doke su-e on-a. Una angade 'Da-oko' niate, aiao da-ode man-pajawakon ine chanchibamana. Iaranga baditaba bilsirangosa nadik re-dike, changsa pil-sa song-e rite on-atpae mande ra-aba kraade kraa da-nang! Da-oni chasongona re-bapile, angni mikronchi nikata dingtang! A-selde maiba dongenggen aro dongna nanga. Chasong bawilange re-angenga aro re-baenga. Obostarang dingtangjok aro dingtangangkugen.

Da-oko niate nion apchangket. Mamatang adatangrang ma-ko noko nirok-sandia dongangjajok; no namchikrangni uamangko mande ra-aba griangengjok; chong-motan, maiba bangbang ong-ani gapjok. Da-o maina indake ong-na nanggenchim, ukoba chanchia nabaenga. Mama adani no namchikko nirok-sandiani, sason ka-ani olgrokjok; maina dal-batgipa chra ong-e an-tangtang bilko gualtokjok. Pil-sara lekka-pora skia man-ahani gimin, skatangtang ine chanchia. Namgipa jatni bewalko ka-sne ka-sne jegalangna, jawa gipinni daka-rikako ja-riknasa ja-ku de-angjok. Namgipa dakbewalrangko ripinge dal-rorona jotton ka-jaha, ine jumanghiba chanchibaenga. Baditaba bilsirang re-ange, salni jani bilsini wenbapila gita, jatna dakbewalrang re-bapilgenkon ine ka-dongani gnanng gisikchi niksoenga. Unon jumang gital niktaigenkon, ukoba jegalsrangnade man-jawa. Je ong-oba namgipa dakbewal rikbewalrangni gimaanganikode A-chikrang sandikue rakkikue ripingna nanggen.



## ANGNI SCHOOL

**1** 934 bilsio angni schoolo napchengani salrangko gisik ra-atpile, iachi angni pilak skigiparangko, sianggimin aro tangenggipa pilakkon mittelpilna ska. Angni school Turao American Baptist Mission Middle English School. Uano Kindergarten Schoolo pangnan naptokchengna nanga. Angaba 1934 bilsio Kindergartenon napeaha. Unoni joljol class VI-onasan dongaiachim. Uni gimin, unon M.E. Schoolko matchotaona dongna nangachim.

Kindergartenon angni Pondit (Skigipa) Ma Base D. Marak ong-achim. Gitrang, bolpilengrang aro gol-srirangchi skichengachim. Pringantin schoolona noktangni bibalrangko ra-anrongna nangachim. Uano dingtang dingtang nokdangrangni bilsa bonga ong-gipa bi-sarang damsan damsan rorima, kal-rima aro porairimachim. Uanon Isolo bi-ani aro dal-batgiparangko mande ra-ani pilakkon skina a-bachenga. Kal-anirangko maikai melie on-grike kal-gen, skigipani kattako maikai tom-tome knatimna nanga, uanon skanggipa skie ra-chenga. Chingni Ponditrang go-olchi sason ka-ja; indiba ka-saachi, malmokachi tom-tomatachim. Ua bilsio Kindergartenon bi-sa sak 36 dongachim. Da-o anga chanchiaton, angni ripengrang banotokjok aro maidakgipa janggi tanganio ong-paenggen, saktiko u-iatna neng-jok, maina anga unomiting bi-samitingchim. Indiba anga an-tangna skiatgipa Ponditkode da-alonaba gualna man-ja.

1935 bilsio, Kindergartenoni jokon, Class A Chongipao napa. Class A Chongipa skangode dongachim. Uno angni skigipa Pondit Lemish K. Marak ong-achim. Kindergartenon chingade A, B, C, D alphabetko poraipaja; indiba Phoneticskosa poraichenga. Iarangko Pondit Lemish K. Marak chingna skichengaha. BA, BE, BI, BO, BU, Laha kana nama chambu,

ine baditaba indakgipa ritingrangni gam·akosa angaba poraiman·baa. Bi-samitingode jinma grai grai mingo suk ong·nikbea aro saksa sakgipinna gam·bate ku·rangtangko knaatna siktoka. Chingni ua Pondit Lemish K. Marak Gracie Fieldsni Ma·a. Anga bi-samitingo chingni Pondit Lemishni bo·rotrot dake kni tom·ako nitonikbeachim. Uno anga bils dok ong·aiengpitti.

1936-37 bilsiode A Dal·gipa classona promotion man·e uno poraiengjok. Angni Pondit Sopodini M. Sangma, Bonet Ma·a ong·achim aro uan Class I-onaba chingko skiachim. A Dal·gipako matchote Class I-ona sokon, A·chikni Ring·ani Gitrangko joljol ring·na man·tokaijok. Angni Ponditrang pilakan skina changa, maniatna man·a aro bi-sarangna ka·sabeachim. Anga Classo pangnan lekka man·batgipa ong·an baksa, a·palni kal·anirangoba boksis man·rongbeaha. Uno anga Ponditrangni ba·ra china, ba·ra ganarangko nirike nie rona sikbeachim aro dal·jokode angaba indake gangen chingen ine chanchirongaha. Chingni Pondit Sopodini M. Sangma alwan tangsek pul dakako (skango Daccas palgipa; da·o man·jajok.) chinrongachim. Dal·jokode angaba alwan tangsekko bree chinpagen ine chanchie anga pangnan matdurongachim. Uandake bi-samitingo rokomari man·pana, dake nipana skani bang·en dongronga gita angaba jotton ka·beaha. Da·o an·tangan chanchiate gisik ra·aton, angni Ponditrang da·alo angko nikpana man·ode namen kusi ong·begenchim inmana.

Class II-ona gadoahaon, Pondit Florence Bangshall, Lana Ma·a, chingni Classni Pondit ong·achim. Ua chingni Classo English Ku·sikko skiatchenggipa ong·achim. Ua schoolo chingni English gam·atani (Pronunciation) bang·baten American English ku·rang ong·batachim. Ua Classonisa "A CAT, A RAT, A MAT" ingiparangko poraichengbaaha. Chingni Pondit Florence Bangshall pangnan gitrangko schooloba a·paloba skijringachim. Skangode chingade a·songni dal·a dal·a manderang -- Viceroy, Governor aro Officerrang re·baode, namen nikrikpana chol man·achim, maina ia chingni American Baptist Mission Schoolkode re·batele niangtokaiachim. Pul

bibalrangni ripokrangko siksoate, Rimchaksoani ripok patani gitrangko Pondit Florence skirongachim. Ua ripok patna bi-sako seokon, pangnan angko seokrongaha. Saheb subarangna kengija dakrongaiani gimin, anga bang-a dal-dalgipa manderangna Ponditni dilachi ripok patatbeaha. Unomitingde bi-sa ong-ani gimin angko seokara mainasai, anga ma-sija. Da-osa chanchiatora, iaba maiba dal-a orto donga ine ma-sia. Angni Pondit Florencekoba anga pangnaba gualja.

Class III-ona sokon, angni Pondit Rangwin N. Sangma ong-achim. Uan Silkigrioni. Pondit Rangwin Drawing baksa Nature Studykoba skiaha. Ua pul baganrangona re-dilange, bibal manchako nie drawing salna skiaha. Classroomo napchipchekana bate a-palo bimangko bipangko nijole noksa salako chinga bi-sarangde namnikbeachim. Ua drawingna mark on-on on-petpetja; nama namjako nie, chatrirangko gisik nangbatatna ine nirokesa mark on-ronga. Da-osa uarangni gamchatakoba nikpilata. Ia chingni Pondit Rangwin namen kni ro-srangachim aro kni ro-ako sakeming nitoe dawile tarirongachim. Ia Ponditni kni ro-a gita angaba kni ro-ode namgenchim ine anga bi-samitingo sruksruk nie rorongaha. Angni kni unomiting ti-akol badeaiengachim. Ponditni knina batpile kni ro-na nanga ine anga pangnan gisiko chanchibeaha. Chanchiani dongoba maiba ong-akon! Ja-mano angni kniba una baten ro-bebeaha. Pondit Rangwinkoba angade gisik ra-engkua.

Class IV sokahaon, chingni Pondit Lehoni W. Momin ong-achim. Ua Mathematics aro English Grammarko skiachim. Chingni Pondit Lehoni namen strict ong-achim. Uni gimin uni Classo pilakan tom-tom jrip jrip knatima. Ua Mathematics man-gipaan. Ua English Grammarko che-em che-em skie, uko sing-piltokon, saksaba aganchakna man-jahani gimin, Class gimikko dara on-tokaha. Pilakkon sing-oba angkode sing-kuja. Bon-chote angko apsan sing-anikon sing-oa angade namen ong-en aganaha. Angkode "Sit down", ine aganaha. Angni ripengrang pilakan dara on-a man-e chadengo anga maidake saksan asonggen ine Classo



mikchidingding asonggija chadengpaani gimin, jinmanaba ka-sachake Pondit pilakkon “Asongbo” insrangaha. Da-o chanchiatosa anga ma-siaha; basakoba ku-rangchi agangijaba dakbewalchi, mikron niachi an-ching jinmana mol-molchakna man-a. Ua Pondit namen mark jaksrama. Ukoba anga nie rorongachim. Ua gana ganoba chador wentiptipe chinja. Uade bang-bata salon baring rongni chador gojsa adhako dodoka aro uni kosako apsan ba gipin rong chadorko gopangpile chinronga. Ukoba bi-samitingode namen nitobee nikaia. Ua Pondit skigipana krakra pangnan kancha ba-ra rongtalbeesa ganrong-chinronga. Ukoba anga namen gisik ra-a.

Da-ode Class V ong-jok. Chingni Class Pondit Serilla K. Sangma (Zilly Ma-a). Ua chingko Historykoba, Sastrokoba man-achim. Skangode History ki-tap A-chikkuchi sea dongjachim. Chingade note on-ako mikot mikot salsa Ponditni blackboardo seako gate, salgipino lesson ra-a. Ponditni seako chinga segatmanahaon, blackboardo seako kimitgala. Pondit badita sea ta-raka uko susana anga chanchirongaha. Pondit sea matchota angaba matchota dakaiachim. Uni gimin chingni Pondit angni deskona re-bae nierongaha; indiba angade matchoten semanaha. Ua ka-dingsmite jrip re-angpilrongaiaha. Uaba saksa namen gisik nangbee skironggipa ong-achim. Ua Ponditkoba anga sriksrik nie rorongaha. Pondit Serillani wagamrangko anga namen namnikbeachim; uni wagamrang nitobeachim. Haida buchumao mai ong-enggen ukode u-ijaha. Indake Pondit sakantini maia nama maia namja namen nirike roani gimin, da-aloba angade uarangko namen gisik ra-beenga.

Da-o anga Class VI sokeaha. Uano chingni Pondit Eugene K. Marak ong-achim. Ua mande daknanga. Matric First Divisiono ka-daldale re-bae, kam ka-na a-bachengenga. Uaba ku-rang ka-sariri skigipasa ong-a. Apsan somoio, chingni Class VI ong-mitingo, Geography Pondit Nur Jehan M. Momin ong-achim. Uaba Matric porikkao First Divisiono pass ka-e kam ka-chengengachim. Ua Pondit git ring-na gong-a aro til-tilpilesa ring-rongachim. Classtangtango napna skang chapel ka-on, school gimik git ring-on, uni git ring-ani til-tilako knae anga

pangnan indake chanchiaha; Pondit til-tile ring-na man-ode, chingaba til-tile git ring-na man-na nanggen ine anga jotton ka-beaha. Ja·mano anga an-tangan All India Radioo Garo Programko ong-atchengo, git dakachi, git ring-paachi, alduani cholko man-paaha. Pondit Nur Jehan ja-manode ang baksa ripengska gitan melipilaia. Ukoba anga gisik ra-ata.

Bi-samiting salrangko gisik ra-atode, ua somoini gitan apsan an-tangko chanchiatmana. Chingni Middle English Schoolo poraimitingode, A-gilsakni Gnigipa Dal-gipa Dakgrikani ong-miting. Chinga bang-beako nikaha, bang-ani gimin knaaha aro an-tangtangba chi-a, ka-a, neng-a pilak dukrangko, dakgrikani gimin man-paaha. Uarang bang-a u-igijako u-irikpaani, nikgijako nikpaani, duk mikchirangko chakpaani, cha-a ringa tekkiani - pilakkon ma-sirikaha. Uaba da-o magna ong-ja ine bilsil briahaosa u-ina a-bachengaha. Chinga ua bilsirango dal-dalbegipa Americani Aeroplane Nokmarangko salsal nikrikaha. Uno American Air Force ine seachim. Unosa angade Americani Jatni A-songni Nisankoba nikchengpaa. R.A.F. (Royal Air Force), iara British Sorkarini ong-achim. Ua bilsirangode aeroplane bilan el-gim el-gim knapilaia. Japan aeroplane bilbaode gam-aan dingtang; uade bobilni aeroplane. Ganti ringringa gitasa chuprete bila. Uni gam-ako knaode, school gimik gimik trench cho-a ning-achi naptoka; katsrapjaode a-ao tugepe dongtoka. Antion indake badita chang chingade kata, nappila dake salrangko re-atna nangachim. Ua somoio American Pilot, Captain Moran chingni School kosakdingding bilbaronga. Aeroplane dal-a. Indita ondike bilani gimin mandekon nikatpilachim. Nawang Pilotsakon ine Tura A-brio nanggakna kenchake manderang aganpila. Ua Americao, chingni Saheb Miss Fern Roldni apsan songoni mande ong-ana, ine School bi-sarangna Chapelo aganatako knapaa. Salsao Captain Moran school bi-sarangna cha-ani packetrang aro sweetrangko chingni American Baptist M.E. School compoundo onbee bile galone donanga. Chinga school bi-sarangde una chaa, una chaa dake, kolamna katruraara! Da-alo uarangko chanchiate ka-dingna skara, maina

mitamrangde mingsakoba kolomna man·paja. Unomiting British sason ong·engani gimin Missionaryrangba jakgitele golpo solpo ka·na, schoolo aganprakatna kenani dongjachim. Salgipinode chingni Miss Saheb Miss Fern Rold chapelona napbaon kusi ong·aan wagam gilgipjajok. Indinaride chinga bina kena; pangnan mikkongjimjim dakronga; mande dal·a, bolchaaba bolchaachim. Da·nang! Da·ode Miss Fern Roldba songtang Americaon siahana.

Bilsil re·angahaoa, nipilate schooltangko gisik ra·ata. Class VI·ko matchoto Middle jokahaon, High Schoolkode gipinchisa poraina nangaha. Bang·bate chubate poraianguoba, dambe bi·samitingo bi·sarangni man·anggipa skie ra·anirang, nike nie u·ianirang pangnaba gimana man·ja. Turani American Baptist M. E. Schoolo angni an·tangni poraipa·e dal·baani ortokode, da·alsa angade maibakai talbate ma·sia.

Ia angni poraibagipa schoolan, A·chik A·songode skanggipa me·chik bi·sarangni School ong·a. Da·o dal·roroe High Schoolona gadoaha; da·ode uko Christian Girls' H.E. School ine mingjitaha. Apsan biapon, apsan compoundon School nok dongkuenga. Ia Schoolko dal·atna chengdiligipa an·chingni American Baptist Missionary Sahebrang re·angahaoa, an·tangtang A·chik me·chikrangni jakchin Schoolko chalaienga aro chalaiangkugen.

(1994 bilsio sea.)



## MA·GIPARANG ARO A·SONGNI MIKKANGCHI ONG·BAGNI SAL-SOMOIRANG

**M**a·giparang aro A·songni Mikkangchi Ong·bagni Sal-Somoirang: ia katta bichong ning-tua; indiba ma·giparangni ka·gni kamranga re·baenggipa salrang somoirangna mai mairang ong·genchim aro da-o maiko daksona nanga, ukosan iano tong·kandibee chanchina mangsonga.

Ma·giparang nokdangni ma·mong, songsaro dal-a kamrangko nirokpagipa, a-songo mongsonggipa songdong-a-chagipa manderang ong·a. Uamangni songsaro dakna nanga kamrangba, jekai uamangni gadang uandaken bang·bea gnang. Bang·bata obostaragon ma·giparang dedrang sakantini gimin ma·a oko kemitingonintal u·isona man·a. Dedrangba oko dongmitingonin, ma·ani duk ba sukko u·ia. Ma·gipa duk ong·beode, saknaode ba kusi ong·oba, okningni bi·sa u·ia. Ua bi·sa atchiahaon, maidakgipa ong·gen uni okningo dongmiting obostaonin u·isoa gita, an·ching pilakan bi·sa desa dongpagiparang chanchie agansoa aro agansoani bebeba ong·ronga. Indiba da-oni a·gilsako bilding bildang ong·bea; sal somoi tik dongja. Ma·giparangsang dos uaba ong·na man·ja. Uni gimin ma·giparang aro a-songo ong·bagni sal somoi aro obostarang namen sagalni tu·a aro salgi bangbangni chua gita dintangbea. Darangba mikkangchiniko aganna katchi niksona amja. Indiba da-oni chasongode, u·isamsona aro niksamsoe aganna man·gipa manderangba ong·katenga.

Ma·giparangsang Future-na ba re·bagni sal somoirangna tarisamsona, kam ka·sona nangaia ua ong·ja, ine anga agangen. Economics subjectko poraigiparang dintang pointrangko ia katta bichongni bidingo on·genchim; maina

bang·a nangdimgimin obostarangchi a-songni mikkangchini obosta ong·a. Jekai :

- (i) **Ong-telaigipa A-sel Ong-anirang** : A-songo sal, balwa aro mikkarangni obostani kri, gitik gitak balminduri, chi dubia, chi ran·kreka, mikka waja, sam-bolrang dongjae a·a a·gisi changa aro uandakgiparangni kri.
- (ii) **A-songo Dakgrik-Dinggrikani** : A-songo u·igijan salo bobil adil soke, dakgrik-dinggrikani kri.
- (iii) **A-songni Janggi Tangani Obostarang/Gadang**: Kosako janapgipa ong·ronggija obostarango, a-songo akal-karap, cha·ani ringani giani, a-songni tangka paisani gamchata tang·onani aro uandakgiparangni kri.
- (iv) **A-songni An·tangtango Rakkiani** : Cholon-bewal ba National Characterni kri.
- (v) **A-songo Sasonni Rokom** : Politics aro Policyrangko ra·gatani kri.
- (vi) A-songo songdonggipa sakantini cholon-bewalrangni kri.
- (vii) A-songo ku·mong-nangrimani ba meli-nangrimgijani kri.
- (viii) A-songni a·palo donggipa a-song gipinni bilrangni bilmanani kri.
- (ix) A-songni manderangni aro a-songni dilgiparangni re·ani kri.
- (x) Bon·kame, a·gilsakni, a-song gipinrangni aro jatrangni re·ani bewalni kri.

Agangimin mingchikking bidingrango pangchake niate niode, ma·giparangni mikkangchina daksona nanga kam, “A-songo songdonggipa sakantini cholon bewalrang” ingipao ma·giparangni kam ga·aka. Ma·giparang a-songni dedrangko ba·aha aro ba·angkugen. Nokdang ge·antion ma·gipa gnanng. Ma·gipa sakantian nokdangni sorkariko chalaigipaba ong·a.

Nokdang ge·antion bang·a manderang atchia, dintang dintang gadango dal·roroa. Je gadangoba dongbo, cha·asia okkriani kri, man·e cha·a rike dongani kri, dintang cholonrangko ong·katata. Tom·tomako namnikgijagipa nokdango, tom·tomako gimaata. Man·adipet, ma·giparang noktango bi·sarangko bilsi chikkingmangonade sason man·pakuani gimin, ua bilsionade dal·bea dakna nanggni donga ine ma·sina nanggen. Ma·giparangni sasonni a·palona re·angon, mitam dedrang nama dilao ja·rikkama; mitamrang rang·sanang dintangangaia. Jeba ong·bo, dedrangkosan sason ka·ani aro uchisan a·songko rikani, a·songni re·mikkanganiko daksoani ong·na nangaija. Da·ororo bang·a ma·giparang skia man·giparang ong·engahani gimin, noktangosan ong·aigija, a·palo, skulo, officerango, sasonni kamrangoba jak on·paenga. Indiba a·song gimikni mande jalaniko niate hisap ka·genode, uanoba ma·giparang ritchaprako sakprak ga·akkuja ine nikatna man·a. Maina indake ong·a? Maina India a·songo me·chikrangko mande ra·ani komia aro me·chikrangsang ma·giparang ong·ani gimin, ma·giparangko gamchate ra·a dongja. A·songko rikpagipa ong·a ine chanchigenchimode, me·chikmarang aro ma·giparangna bang·bata chol aro namgnirangko on·na a·songni sorkari aro songsar chanchigenchim. Uarang an·chingo dongja. Be·en gisik an·sengosa pilakba kusi ong·e kam ka·a.

Uni gimin sorkari aro songsarba me·chikrangni, ma·giparangni obostakosa nambatatna tikkelnang nanga. Ma·giparang kusi ong·osa, an·sengbaljokosa, nokdangko aro dedrangko name nirokna man·a. Songsaro, toromo donge dal·drogipa bi·sarangsang, an·tangtangna chanchigija, gamna tangkana mikbokgija, a·songko jattangko kakketo sason ka·na aro nama ramao dilna man·gen.



## NATIONAL FILM AWARD : 1993

**B**ilsiantion a-gilsak gimikni dal-batsranggipa boksistrangko Indiani Film tarigiparangna on-ronga. Uandakeba filmo kal-giparang, git tarigiparang, Directorrang aro filmni kattarangko segiparang, photo ka-giparang aro filmna kragipa golporangko segiparangoni changbatgipa aro nambatsranggiparangna "Award" ba uamangni kamrangko nirike on-ani aro jinmani ra-chake sabas inpa aro gita boksistrang gnang. 1993 bilsio an-ching A-chik jatna janggi tanganio nangchapgipa obostarang, manianirang aro chrokmesaani gimin tarigimin Documentary "Wangala : A Garo Festival" National Awardko man-aha. Ian an-chingni rasong chabeani aro kusi ong-beani ong-chongmota. Jat ge-antini janggi tanganio, maiba dingtangmanchagipa ong-telaigipa gunrang gnang. Uko maichi ong-ata? Atchu ambi gitchamrang lekka-pora dongpaja beben, indiba salantini janggi tanganio mande aro Dakgipa Rugipani ong-atgiminrang baksa bang-bea nangrimani gnang. Balwani bala, sal nabaa, salni napanga aro bilsu kari re-baa aro re-anga, matburingrang aro do-orangni ring-an ku-rangchi maiba ning-tubea chanchianirangko atchu ambimangni gisiko naataha ine nikna man-a. Chasong re-angaha aro re-baenga aro re-angkugen; indiba mandeni samtangtango ong-atgiminrangko nie aro manderanga matburingrangna bate gisik dongbatani gimin, uarang pilakko man-gope, an-chingni gitni sulrang, chrokani bimangrang aro maniani obostarang inditan gamchataha aro nitoaha aro knatobegipa ka-tongni sulrangba ong-kataha. Uarangba ka-sne ka-sne gimaangna a-bachengengaha ine nikatna man-a. A-chikde pangnaba an-tangtangko nitooba nitonikgija dake, changbeoba changnikjae, u-ioba u-ija gita rona sikgiparang ong-a. Indiba gipin A-chik ong-pagijarande, an-chingni nitoako,

an-chingni chanchiako, changa-sapako nie matduatskaenga. Iarango che-em che-em ning-tue chanchigenchimode nikgen, an-chingni janggi tangbagimin aro jakkalbaenggipa maniani, chrok-mesaani, sika-moani aro an-sengani namen ning-tua aro chi-achim.

“Wangala : A Garo Festival” filmko tarianio sawa, maikai aro badita jotton ka-bee chu-sokataha an-ching nina. Neng-e kam ka-gipa sakantini kusini bak-rengsiko man-paani aro jinmani ra-chakaniko man-paaniara namen gamchatbea.

“Wangala : A Garo Festival” filmko 1992 bilsio matchote tariaha. Ia film minit 60 ro-a; uko 16 mm Eastman Colouro aro English ku-siko tarichengaha. Indira Gandhi National Centre for Arts, Central Vista Mess, Janpath, New Delhio donggipa, Centrena ia Documentary Filmko tarie on-aha. A-chik ong-pagijagipa, ia Centreni Director Dr. Kapila Vatsayan, saksa skia man-begipa Indiani me-chik, ian a-songna aro jatna ripingna nangchongmotgipa Garo Culture ong-a ine nikaha.

Ia Documentaryo, A-chikni Wangala maioni a-bachenge bano bon-ea aro wanchoto maikai jinma grai grai, meli-nangrime, songsa songgipinni manderangko okamgrike cha-a ringa uko mesoka. Uandake Wangalara mia misi, a-bao ge-e game man-gipa biterangna Pattigipa Ra-rongipako mittelpilna tom-dakani ong-chongmota. Iarang pilakko nigope, ia manianio maikai mande aro Isolni ong-atgiminrango inditan ning-tue chanchianiko naata, A-chik ong-pagijagipa Director Dr. Vatsayan nikaha. Uni gisik nikprotanichi, ia filmko bikotna manderangko sandion, ua gipin jawaoniko sro-ra-chakna nangjajok. An-ching A-chikrango donga. Ia katta bichongni bidingo sandie man-gipa Adviser an-chingonin -- Dr. Dharendra Narayan Mazumdar, jekon an-ching uni dejakra demechik Giribalani himingchi Balapa ine okama. Balapa an-ching A-chikni chawari, saksa skia man-begipa, mingsingbegipa Anthropologist ong-a.

Dr. Mazumdar nok chone rike Matchakolgreo dongchengo, “Tolstoy Ashram” ine see tapako nike sing-oa, uni ortoba donga ine aganchaka. Ia Balapa namen A-chik jatni



gimin bang·a serikanirangchi, an·tangni nike dake u·igiminrangchi ning·tubegipa, gamchatbegipa, ripingna kragipa itihaskoba a·songna u·iataha.

Balapani siani ja·mano, uni demechik Giribala G. Momin aro Giribalani segipa Barlind M. Sangma Documentaryko matchotatna nangchongmota ine ma·sie, mande sandion, an·ching an·tangtangni A·chik depante saksa Llewellyn Rangs Marakko man·aha. Llewellyn Pangrakpa indake jatangni dakbewal rikbewal aro manianirangni gimin saksanba korostangchi kamrangko ka·engachim. Indake Adviser dal·gipa Balapa siangahaoba, kam bon·chongdikjaha.

Llewellyn Marak kamko jako ra·rikskae, film tarigiparangko namen dakchakbeaha. Un baksa ka·ringiparanga, Ku·rang chipgipa Audiographer Sanjay Chatterjee aro Cinematographer Vivek Banerjee. Ua filmni Directorara Bappa Ray.

Mingsa dal·begipa kamko chu·sokatanina Dr. D. N. Mazumdar Balapako aro Llewellyn R. Marak Pangrakpako mitteltokna krabea.

An·chingo gimaangenggipa dakbewal, manibewal, chrok·mesaani, dingtang dingtang knatobegipa A·chikni ring·ani ku·rangrang gnang. An·ching salsalanti knaoba knagija gita, ua gamchatgipa sulrang, kattarang, maniao minggiparang aro orto gnanggipa golporangko janggilatangenga. Uni gimin mingsa jatni bimik aro mikkimko ripingani cholde iachiba ong·a. Badita knakugijagipa, ring·ronggijagipa sulrang dongachim, uaba da·ode gamchatbabeengjok Chasong wilwil dawil re·engon, hai an·chingba ku·rangtangko, sultangko gimaatjana.



## SALGRO-SALARAM A-DOK

**A**n-chingni A-songni Salgro-Salaram A-dokara, a-songko Abobil ginaloniko naljoke rakkina nangbatgipa jolo ga-akbatgiparangoni damsa ong-a, jean China, Bhutan, Myanmar aro Bangladeshni sima-arirangming nangchapa. Salgro-Salaram A-dok batanggimin bilsa 46 mangna so-sojengjeng ong-eng. Iara New Delhio sason ka-enggiparangna namen chanchibena nanggipa obosta ong-a. Ia a-dokni jol-biap dongani aro sasonni gita mongsonganiara bil bang-batgipa jat-a-songrangni nikaniona sokaha. Uni mande jela-jelgijani, piprae ma-kae dongani aro a-bri a-kong a-ani bimang namen dingtangbea.

A-doko a-ningni gamrang bang-bea. Uni ong-telaigipa gamrang a-palni manderangni niamrooenggipa mikronrangoni jokna man-ja. Salgro-Salaram A-dokni manderang iarangon gaora de-a, rasong chaa.

Da-alo sakantikon jajaatgipa dal-gipa sing-aniara -- Nang-ko maia sa-dik-saknaatenga - Salgro-Salaram A-dok? Bang-a sing-anirang nabaa aro re-anga, indiba ia dal-begipa obostako namatpilani chol dongja. Iara sasonni gita daksret-dilsretani giminma, ma daka-rikani karkanarang dongpajaesama, ma a-paloni maiba golmal ong-atani giminsama? An-ching ka-sara Salgro-Salaram A-dokni dondik donchanggija so-sojengjeng ong-anio sanibade jak dongchongmotna nanga.

Ja-manchakdugana skangan, Salgro-Salaram A-dokni manderangko ia obostao ga-akatenggipa ja-pang ja-dilko an-ching ma-sina tale ra-na jotton ka-na.

Salgro-Salaram A-doko ia namjabegipa obostara Salgro-Salaram A-dokmangmangnasan ong-ja; iara Jat-A-song gimiknan ong-a. Ia A-dokni manderang da-alo uamangni janggi tangenggipa rokom-bewal manchaon ka-dongani griroroangengaha.

